




· 17248

古香齋鑿賞袖珍春明夢餘錄卷之三十九

亦精圖



禮部一

禮部在闕東戶部之南西向宣德五年建時府部公署皆未營造以典禮之區萬方會同有事於此遂首建焉至六年六月成賜身落之公侯卿貳皆與焉本部尚書擬春官掌天下禮樂祭祀封建朝貢宴享之政令叙辨階秩以贊於天子侍郎爲之貳其屬初曰儀部曰祠部曰膳部曰主客部後改爲儀制祠祭精膳主客四司俱稱清吏

喜齋春明夢餘錄

卷三十九

一

儀制掌禮文宗封學校舉貢之事天子卽位天子冠若納后若冊立皇太子若上慈宮徽號若朝賀朝見若大宴饗則舉諸儀辨其名數條上之報可而令於諸司凡傳制開讀表箋學校貢舉文移印章官民服舍皆辨儀式而頒之諸司凡巡狩親征班師策勛行賞第禮儀條上凡祥瑞辨其物名類奏大瑞特奏無得請封禪以蕩上心以鄉飲酒禮讀律誥訓禮讓以養老尊高年以卹貧宣仁政以旌表章勸勵以建言議利病以連坐謫戍禁官邪

祠祭掌祭饗獻薦天文國卹廟諱之事辨大祀中祀小祀

之等而敬供蠲飭第其牲帛配侑從介差其禮樂凡王國
司府衛所州縣祀典神示稽令甲而播之百司督日官歷
象而在其徵變日月食起止分而豫移諸司大災異卽聞
次類聞並乞脩省凡國喪若品官庶人喪皆辨其同姓九
族異姓母族妻族親疏之等而爲三年期大功小功總之
制傳古喪禮損益頒行之凡謚帝后妃太子太子妃王郡
王以字爲差次勛戚文武大臣請祭墓贈謚移諸司覈行
能傳公論定議以聞其侍從勤勞死事官品未應謚若夷
王夷使得特謚凡帝后愍忘祀於陵輟朝不廢務凡天文

地理醫藥卜筮師巫音樂籍其人母得以術越境興妖妄
毋藏識緯元象凡僧道三年一度度必通經咒周知冊檢
其僞冒而嚴其禁令凡雅樂屬於祠祭太常領之俗樂領
於伶人

圭密掌戎夷朝貢往來宴賜之事凡番夷辨其五年三年
比年年至年再至之貢與其貢物貢途貢使豐約遙徑多
寡之數王若使至賓待之差其迎送宴勞賞賚室廬帳幕
食料之等嗣封者爲請使頒冊於其國諸大酋有保塞功
者授冊郊封之以信符徵勘合以金敕諭差發以通事譯

夷情以開市平交易以折計收番貨以刑典禁交通凡賜均賞特賞各有差凡役中歲徵其方物有常式

精膳掌宴饗牲牢酒膳之事凡膳羞珍品酒醴光祿頌之會其數程其出納凡馳宴辨職官品秩之等凡番夷士官辨下程宴次食料多寡之等凡厨役僉諸民次僉諸王府典膳之久次者凡歲藏冰出水移所司謹潔之

成周盛時以禮持世凡其所以建國而辨方正位體國經野設官分職以爲民極者皆謂之禮不徒以祭祀燕享冠婚賓射以爲禮也太宰掌建邦之六典以

治典爲先而禮典僅居其一然其書不謂之治而謂之禮秦漢以來凡其所以爲治者皆謂之政特以其所以施於郊廟朝廷學校而有節文儀則者則謂之禮蓋三代以前以禮爲治天下之大綱三代以後以禮爲治天下之一事古今治效有隆污之異者以此

禮制

夫子遺經皆經諸儒校定獨禮無成書朱子於寧宗四年致仕家居始修禮書名曰儀禮經傳通解其書大要以儀禮爲本分章附疏而以小戴諸義各綴其

後其見於他篇及他書可相發明者或附於義其外如弟子職保傅之屬又自別爲篇以附其類其目有家禮鄉禮樂禮邦國禮王朝禮喪禮祭禮六傳外傳其大體已具者蓋十七八先是草奏欲乞修三禮曰遭秦滅學禮樂先壞漢晉以來諸儒補輯竟無全書其頗存者三禮而已周官一書固爲禮之綱領至其儀法度數則儀禮乃其本經而禮記却特牲冠義等篇乃其義疏耳前此猶有三禮通禮學究諸科禮雖不行而士猶得以通習而知其說熙寧以來王安石

變亂舊制廢罷儀禮而獨存禮記之科棄經任傳遺本宗末其失已甚而博士諸生又不過探其虛文以供應舉至於其間亦有因儀法度數之實而立文者則咸幽冥而莫知其源一有大議牽用耳學臆斷而已若乃樂之爲教則又絕無師授律尺短長聲音清濁學士大夫莫有知其說者而不知其爲闕也臣昔在山林嘗與一二學者考訂其說欲以儀禮爲經而取禮記及諸經史雜書所載有及於禮者皆以附於本經之下具列注疏諸儒之說略有端緒而私家無

書檢閱無人抄寫久之未成會蒙除用學徒分散遂不能就而鍾律之制則士友間亦有得其遺意者竊欲更加參考別爲一書以補六藝之闕而亦未能具也欲望聖明特詔有司許臣就秘書省闕借禮樂諸書自行招致舊日學徒十餘人踏逐空閒官屋數間與之居處令其編類可以興起廢墜垂之永久使士知實學異時可爲聖朝制作之助則斯文幸甚會去國不及上朱子修禮書時年已六十有八越三年而先生捐館舍書迄未完門人黃幹楊復補喪祭二禮以成書先儒言後之言禮者不至棄經而任傳違本而逐末賴有此書

臨川吳文正澄著三禮考註一書考周官以正六典以大司徒之半補冬官之闕蓋取陳氏俞氏之論也以儀禮爲經禮記爲傳蓋取朱子之論也其言曰因朱子所分禮章重加倫紀其經後之記依經章次秩序其文不敢割裂一仍其舊附於篇終其十七篇次第並如鄭氏本更不問以他篇須十七篇止經不至雜揉二載之記中有經篇者離之爲逸經禮各有義

則經之傳也以戴氏所存兼劉氏所補合之而爲傳
正經居首逸經次之傳終焉皆別爲卷而不相紊而
外悉以歸諸戴氏之記朱子所輯及黃氏喪禮楊氏
祭禮亦參伍以去其重複名曰朱氏記而與二戴爲
三凡周公之典其未墜於地者蓋略包舉而無遺造
化之運不息則天之所秩未必終古而廢壞有議禮
制度考文者出所損所益百世可知也

朱文公熹居母憂自始死以至祥禫參酌盡變因成
喪葬祭禮又推之冠婚以成編曰家禮冠禮則多取

司馬氏婚禮則參司馬氏程氏喪禮本司馬氏後又
以禮部侍郎高閔益學之書爲最精多採用焉書成
一侍子竊之亡去文公沒而其書始出自叙曰三代
之禮其官廬器服出入起居之制節皆已不宜於世
世之君子有意乎禮或遠其本而務其末緩其實而
急於文苦其難而不能舉其要也其困於窶貧者尤
患其終不能及於禮熹之愚蓋兩病焉是以嘗獨究
觀古今之禮少加損益爲一家之書其大體之不可
變者則以謹名分崇愛敬爲之本至其施行之際則

又略浮文敷本寔以附於孔子從先進之意誠得與同志之士孰謹而施行之古脩身齊家之道慎終追遠之心庶猶可得復見而國家崇化導民之意或具有小補云

洪武中命儒臣陶安定郊社羣祀禮簠同定四廟祫祭禮李善長定官民喪禮朱升定祭祀齋戒禮崔亮定五祀禮劉基定百官朝會禮魏觀定祭祀禮陶凱定軍禮而又令天下郡縣舉高潔博雅之士年四十五以上者於是徐一夔梁寅周子諒胡行簡劉中弼董

爨蔡深滕公玖會魯至京編集大明集禮

洪武中所著禮書曰國朝禮制曰稽古定制曰國朝制作曰大禮要議曰皇朝禮制曰禮儀定式曰大明禮制曰洪武禮法曰禮制集要曰禮制節文曰太常集禮曰禮書上之郊廟朝廷次之侯王郡邑下之閭巷州黨制度俱備

洪武五年詔曰朕聞三皇立極導民以時庖厨稼穡衣服始制民居食焉五帝教以仁義蓋未備之時宜天下從之民用和睦自周至於漢唐宋增損益周國

乃用昌民受時宜家用永康朕蒙皇天后土眷命祖
宗之靈統一天下紀元五年朕本草芥失習黷經况
摧強附順二十餘年居無寧日胡理道未臻民不見
化鄉閭市里尚築舊俗天下大定禮儀風俗可不正
與茲條畫事宜再整鬻倫恤念孤寡務遵先王之法
顧以德薄恩澤未孚下民未說恐貽上天之怒夙夜
祇懼若履淵冰咨爾臣庶體予至懷期臻禮義之風
永膺昇平之治

崔文敏統曰禮者理也人心之理協之以同然卽百

世可通也今王祭無樂大臣無廟仕者不奔祖父母
之喪無功總之假冠婚任俗飲射具文民無定志而
濫士異學而莫止俗人道流秉禮司頌齊民下賤踰
限犯分雖有洪武禮制而廢莫或行夫國無禮猶水
無坊人無禮猶室無基衝墻地毀夫焉有極哉禮樂
積百年而後興宜詔徵四方明道與學之儒萃於京
師準以典誥案以三禮參以詩之詠歌孔氏遺言皆
比以今法寧要毋繁寧徑毋易裁成明典行之天下
垂後世範俗同德一邦其永孚於休矣

屠康僊勳論三大典疏臣猥以凡庸叨司風紀茲當
皇上繼體改元之初正祈天永命之旨百度維新萬
化攸始首卜郊祀藉田幸學三者夫郊祀所以敬天
尊祖祀典之載於經者自虞舜肆類上帝禋六宗望
山川徧羣神爲命而告也虞書而下莫詳於周禮禮
記思文之詩郊祀后稷以配天我將之詩則宗祀文
王以配上帝蓋以萬物本乎天人生本乎祖此郊祀
而配祖者大報本反始之道也至於以時以樂以牲
以器之類各有其義降及秦漢唐宋或郊或不郊或

合或不合或祀白帝或祀黑帝其祀不同或三歲一
郊或過期不郊其制不一甚者或以求仙而行或以
祈嗣而行皆出於道家者流怪誕不經瀆亂非禮無
復古人報本反始之意矣殊不知天卽帝也帝卽天
也以其形體而言故謂之天以其主宰而言故謂之
帝其寔非有二也安得有如異端所謂天皇太乙之
號哉我聖祖龍興定爲天地合祀之禮列聖相承以
太祖太宗配享一用古禮參之周制分命羣臣各獻
二十四壇其儀文制度至精至備三代而下祀典之

正未有如我朝者究其所以有密緝熙顧諟祇肅此則歷代敬天法祖之大略也藉田者所以重農厚俗考之月令孟春之月天子乃以元日祈穀於上帝乃擇元辰天子親載耒耜措之於參保介之御間帥三公九卿諸侯大夫躬耕帝藉天子三推三公五推卿諸侯九推又曰王命布農事命田舍東郊皆脩封疆蓋天子藉田千畝收其穀爲粢祀之粢盛而必躬爲之者以爲天下之農民帥先爾天子旣身爲之帥先又必命田畯之官以督其耕其重農事如此舜命官

曰食哉惟時播厥百穀成王戒農官曰敬爾在公王釐爾成其見於詩有若七月皆言農桑之候其見於書有若無逸具言稼穡之艱厥後漢之文帝詔耕藉田以給宗廟粢盛又親率羣臣農以勸之賜民田租之半景帝親桑以奉宗廟粢盛祭服爲天下先自周以迄唐宋莫不以此爲務然躬耕藉田者必祀先農我朝歷聖躬祀先農親行耨田禮如古制具有成法誠以民爲邦本固邦寧民之所恃以生者食食之所賴以足者農耳幸學者所以崇儒重道天生孔子

寔萬代帝王之師文王世子天子視學大昕鼓徵所以警衆也衆至然後天子至乃命有司行事興秩節祭先聖先師蓋學校禮義之所在聖賢道德之所宗萬乘所以親臨之也雖曰以聚賢斂才而是以崇儒重道也漢明帝初建三雍親行其禮備法物之駕盛清道之儀尊養老饗射禮唐高宗幸國子學親行釋奠太宗召純儒耆德以爲學官數臨幸親釋奠命祭酒博士講經賜帛增廣學舍宋太祖太宗數幸國子監詔講易卦堯典說命哲宗詣文宣殿行釋奠禮命

祭酒豐稷講尚書無逸之數君者雖非三代庠序學校之比而其所以敬仰休風循古良規者殆亦可取我聖祖首建太學車駕親臨列聖相承循是道所以勉勵師生者諄切詳備諭以聖人爲學之道期以帝王作人之功具載御製五倫等書貽厥孫謀以燕翼子正在陛下今日之舉耳之三事者其禮相因其事至重不考古無以証於今不盾問無以探其本伏望皇上念茲三事之大不徒循故事之美觀必求行三事之實意特敕館閣儒臣經筵衍從講求郊禘配

享之禮思文我將之詩法三代以上所行之善監秦漢以下所行之失然儀文不備無以合古誠敬不足無以格天必真知上帝之享享於克誠黍稷之馨不如明德必仁必孝善繼善述則一陟一降在帝左右而感通之妙上帝居歆億萬年之丕基兆於此矣所以藉田者必求古人分井經界之法豳風七月之詩周公無逸之篇我列聖重農之訓必崇節儉以爲裕財之本必薄稅斂以爲足食之原禁游惰則爲之者衆省力役則不奪其時正經界不爲外戚之所占均

田里不爲豪戶之所侵貴五穀賤金玉務農桑益種樹如此而帥先天下宣其德意作其農功勸相有方倉暴不作則仁心仁聞天下被其澤而勸農之政行矣所以幸學者必尊德樂道以正天下之人心親賢納諫以厚天下之風俗師嚴道尊如學記之所存赦怠吉凶如丹書之所戒如此而帥先學校則人倫明教化興風俗丕變人才彙興矣竊見先儒真德秀大學衍義一編具載脩齊治平之道依經據史引物連類言天必有徵於人語事而不遺於理善惡必錄綱

目詳明誠君天下者之律令格例也陛下於經筵講
論書史之中常以此書進講仍以別冊置之便殿以
備清燕之覽則所以事天重農崇學以隆聖治之禮
舉不出於此矣

宗伯沈鯉議從祀疏巨等裒集衆論較量其間預廷
議者共四十一人除註有原疏外內註胡居仁從祀
者二十五人註王守仁陳獻章者俱十五人蔡清五
人羅倫二人呂柟一人居仁則仍有專舉且無疵議
在石星則議二臣不宜立門戶講學在邱樾則議守

仁乃禪家宗旨在吏部右侍郎王家屏則又謂從祀
重典非真能信今傳後者未可輕議非見其能信今
傳後者亦未可輕議若使後日議黜恐反爲盛典之
累故未敢遽擬其人也臣等反復參詳看得從祀一
事持久不決必煩廷議者則以在廷之臣可以盡天
下之公議而衆言僉同人品自定所以要之於歸一
之論也今預議諸臣舉從祀者莫不以胡居仁第一
卽有次及居仁與其不舉者亦毫無異議及臣等考
其平生與其論著亦大都淵源孔孟純粹篤實一時

名士如羅倫張吉婁統周瑛高明賀欽羅欽順張元楨之類皆極口稱道比於薛瑄而次其論著與瑄之讀書錄並傳焉斯其爲孔子之徒已彰明較著有歸一之論矣如蒙俯賜采納容令臣等以居仁行實撰議上覽符允從祀自足以仰承德意增重儒林豈必求備蓋我明道化翔洽人文輩出二百年間侑食孔廟者僅薛瑄一人誠慎之矣今距祀瑄之後未二十年而又得居仁與之並祀亦所謂且暮遇之比肩而立者雖一人不可謂少也至如守仁之學在致良知

獻章之學在於主靜皆所謂豪傑之士但預議諸臣與之者僅十三四不與者已六七十甲可乙否殊未有歸一之論以稱上意指臣等亦何敢輕議查得嘉靖十九年亦曾廷議薛瑄彼其時固毫無間言也而庶子童承叙贊善浦應麒猶以爲事體重大莫若少緩竟以報罷至隆慶元年復下廷議則在議諸臣或挽或推惟恐其不預於澤宮尸祝者何人心之同也夫惟人無異議故盛典一舉至今爲俎豆之光今守仁獻章既不能毫無間言又一時與議之臣亦多有

者舊老成直亮多聞之士而不皆爲二臣左袒者是
輿論未協而事久論定尚非其時也臣等有感於承
叙應麒之言故輒敢效其愚亦請暫緩之以少候公
論之定而徐議於後似亦未晚蓋事可垂千萬年而
不朽者卽遲迴數載而不爲逾時禮有垂千百世而
示法者卽詳審再三而不爲過慎與其祀也而有議
豈若議定而後祀乎蓋可祀不祀者其失怠怠猶可
補於將來未可祀而祀者其失誣誣則貽譏於後世
拾漭反汗勢豈能及是不可不爲深計也昔者孟軻

氏之告其君曰國君進賢如不得已蓋至於左右皆
曰賢諸大夫皆曰賢而猶未敢信必至國人皆賢也
而後察又親見其賢也而後用彼固一人之進退一
時之是非耳而猶然若是矧是舉也在朝廷則象賢
崇德見道揆法紀之公在天下則章軌作人爲俗易
風移之漸所關甚鉅可嘗試而慢爲之耶如皇上以
我朝人文遠軼前代不宜寥寥焉若是臣等謂居仁
而祀不可謂寥寥矣蓋隆古以還士之以行誼道德
令聞長世者非託之於顯位則託之於門閥非託之

於文章則託之於勳美順風疾呼聲聞易達所藉然耳如居仁者固深山窮谷之士而布衣章帶之夫自非其德有過人負二代之斗山於當世擇地而趨噉心而語其誰爲傾耳而聽正目而視者惟皇上超然遠覽拔之於儔伍之中榮之於崇祀之位則日月之光賁及豐蔀雖在齊民無不興起比於祀壇尤爲盛事茲臣等之所謂一不爲少也至如蔡清羅倫章懋黃仲昭陳真晟呂柟羅欽順鄒守益中間或未有專祀者仍望推廣德意專祀於鄉通候論定之日另議

從祀則仁至義盡可爲天下萬世之法將見薪禰之道以光蘋藻之禮不濫一舉而二物具矣再照講學爲致知之事聖門之所謂條理之始也天學亦安可不講也顧臣等之所謂講學者殊無甚高論蓋六經孔孟之道旣昭如日星而漢宋諸儒之書又發明殆盡後雖有迷何以復加所貴乎學者亦守其師說慎思明辨如何爲格致誠正如何爲齊治均平隨事精察敦行不怠雖暗室無媿必白首一節如是焉而已世之學者不務爲平易而厭薄古訓欲自名家至爲

續鳧頸以見長添蛇足以工畫於子臣弟友日用常
行之道反視爲弁髦不講焉其又有奇者則片言單
詞樹之赤幟而天下之喜爲名高者亦苟見前茅之
所在遂靡然裹糧而趨之口耳一言反復辨難至窮
年不能殫其說其流之弊將有內棄其事而外棄其
主之事以釀成清談之俗者此不可不爲早辨也伏
願皇上既慎簡可祀之人又溥發德音使天下知朝
廷之所以崇祀者意在此不在彼則世道人心不勝
幸甚按孔廟從祀爲禮之大者龍江先生此疏欲止
閣中竟以密揭中旨行之此何等事而可如是與

樂旨

宋周元公愷頤之論樂曰古者聖王制禮法修教化
三綱正九疇叙百姓太和萬物咸若乃作樂以宣八
風之氣以平天下之情故樂聲淡而不傷和而不淫
淡則欲心平和則躁心釋優柔平中德之盛也天下
化中治之至也是謂道配天地古之極也

宋建陽蔡元定著律呂新書二卷其上卷以漢志斛
銘文定長九寸空圍九分積八百一十分爲黃鐘第
一以淮南子漢前志本黃鐘之律以三厯十二辰積
之得一十七萬七千一百四十七爲黃鐘之實第二
以黃鐘三分爲損益定生十二律第三次十二律之
實四次變律五次律生五聲圖六次變聲七次八十
四聲圖八次六十調圖九於是候氣審度嘉量權衡
次焉爲十三篇其下卷述前史書志經傳疏注呂氏
春秋淮南子下至歷代會尺款識用以明造律和聲
著而互慎之稱明遠矣

白南宋及元以至於今皆用大晟樂考大晟樂乃方
士魏漢津之所造取徽宗指寸爲律故考亭曰崇宣
之季姦譖之會黷涅之餘不足以語天地之和然金
太宗取汴得之改爲太和樂流傳入元及明破燕京
得其樂工今太常雅樂與學宮所謂大晟樂者皆漢

津之遺而徽宗之指也至其百戲隊舞亦元聲之遺樂章又近淺無爾雅之辭太祖一革元政而此事却謂金得之宋先王之遺不復改創而當時儒者亦憤然不知所自世宗制禮作樂而止於儀文之末畧其元聲之本亦張夏諸人之過也

元人吳萊大晟樂論鄉予北遊京師聞太常所用樂本大晟之遺法也自東都失守大樂氏奉其樂器北趨燕都燕都喪亂又徙汴蔡汴蔡陷沒而東李巖侯獨得其故樂部人國初有旨徵樂東平太常徐公遂

其樂向日月山奏觀乞增宮縣登歌文武二舞令舊工教習以備大祀故今樂戶子孫猶世籍河汴間僅能肄其鐘鼓鏗鏘不復能究其義矣予因考求前代議樂自和峴以下更六七鉅公而議論莫之有定前日之宿懸者本謂樂和曾未幾時條已改鑄或云樂失之清或云樂過於濁樂工治卒且深厭其爐鞴鼓鑄之勞則或自取其樂之協時加銅齊以濟之當軒臨試雖以老師宿儒終不能心悟其銅齊之輕重而徒論其銅律之清濁也迨夫崇寧之世魏漢津乃以

蜀一黥卒爲造大晟樂府遂頒其樂書於天下蓋謂古之制樂者惟黃帝夏禹得樂之正何則聖王之稟賦上與天地陰陽爲一體聲則爲律身則爲度故夫黃帝夏禹之制樂實自其身而得之臣今請以聖主中指三節三寸定黃鐘之律中指之徑圍又卽據而定爲度量權衡樂以是制則臣將見其合天地之正備陰陽之和而得夫金石清濁之宜矣當是時惟丞相蔡京最神其說先鑄帝龜八鼎復造金石鐘簋雕幾刻鏤蓋極後世之選已然以崇寧之指尺旣長而樂律遂高惟漢津亦自知之嘗私謂其弟子任宗堯曰樂律高北方元鼎水又溢出律高則聲過哀而國亂水溢出則國有變而境土喪沒是不久矣嗚呼漢津所制豈復有加於和峴以下諸人所論之樂哉然且至今沿襲相承未聞有所改作樂殊不可以草創苟且而遽定也雖然崇寧之樂亦可變矣蓋古之論樂者一曰古雅樂二曰俗部樂三曰胡部樂古雅樂更秦亂而廢漢世惟采荆楚燕代之謳稍協律呂以合八音之調不復古矣晉宋六代以降南朝之樂多

用吳音北國之樂僅襲夷虜及隋平江左魏三祖清
商等樂存者什四世謂爲華夏正聲蓋俗樂也至是
沛國公鄭譯復因龜茲人白蘇祇婆善胡琵琶而翻
七調遂以制樂故今樂家猶有大石小石大食般涉
等調大石等國本在西域而般涉卽是般瞻華言羽
聲隋人且以是爲大簇羽矣由是觀之漢世徒以俗
樂定雅樂隋氏以來則復悉以胡樂定雅樂唐至元
宗胡部與俗部並樂王肄樂坐技不通然後發爲立
技立技不精然後使教雅樂天下後世卒不復知有

古雅樂之正聲矣自唐歷宋大抵皆然是猶未能究
夫樂律之元而僅拳拳於黍尺指尺之同異及乎大
晟樂府之立吾殆未知其尚有胡俗之雜耶抑果雅
樂之正也夫以雅樂平淡而聲緩胡俗繁碎而聲急
今大晟之樂律太高樂聲急矣當大晟樂書之行教
坊色長張俱會制大樂元機賦論七音六十律八十
四調本不脫乎龜茲白蘇祇婆之舊正行四十大曲
常行小令四部絃管猶或尚循乎大唐五代梨園法
曲之遺此非胡俗之雜行者乎宜雅樂之未易遽復

也然吾就俱之所學嘗謂樂工肄樂先須通達強記
巧妙幹旋復窮十載晝夜之思而務諳前人格犯之
正故不可以草茅無識而輕議樂又况漢津蜀一黥
卒稍窺范景仁司馬君實之議論而且得與夫黃帝
夏禹配食於樂成之廟尚可至今沿襲而不變耶嗚
呼誠以世之通音曉律者或也夫何天下四方之
所尚胡俗伎樂率多輕儇剽殺嗷呶縱肆前後後驟
不中音節他則倡優雜劇類且青紅塗抹子女雜褻
導淫教媿不得禁止然以胡俗之樂音節不中則聲
氣淺浮而日趨於薄倡優之伎禁止不行則風俗流
蕩而不知所返此雖小節所係甚大漢諺有云宮中
好高髻城中高一尺宮中好長袖城中全匹帛意者
朝廷合議先正雅樂然後天下四方悉更胡俗二部
之不正者悉歸於正而後止殆不可視是爲千古之
絕學也然古者律歷二事更相爲用太史郭公一嘗
定歷誠曠世所未有予謂宜依古法緹室葭灰隨月
候氣天地之中氣旣應則鐘律之中聲當無有不應
者要在久而後驗樂殊不可以草創苟且而遽定也

嗚呼崇寧之樂亦可變矣吾又安得夫伶倫樂緩之徒而與之共論樂哉

禮樂箋曰說者論大晟樂爲宋方士魏漢津所製此未考本末不知樂律者也宋濂議漢津製樂爲亂世之音在洪武四年而冷謙所定樂舞爲洪武之六年樂章猶宋之舊而樂音非宋之音矣以何知之以律而知之蓋謙所製者爲太簇之羽中呂調也漢津所製其迎神初奏爲南呂之角大呂變調也與謙之樂如參辰黔皙之不相合矣蓋謙之七均自太簇夷則

夾鐘無射中呂皆正調也惟清黃清林巧爲變調然此二變音也固無妨於變也漢津之林鐘爲宮者僅商角二音爲正調其徵羽變宮變徵皆屬變調是七均之中而變者居四矣南呂爲宮者僅商音爲正調其徵羽角變宮變徵皆屬變調是七均之中而變者居五矣又况漢津之律卽李照之律下古樂二律所謂黃鐘者僅中太簇則其林鐘之宮僅中南呂南呂之宮僅中應鐘應鐘管長四寸六分有奇而商角以下六均無一不出於變矣君則其細已甚而臣民事

物靡然不振哀淫怨咽此真亡國之音也豈可與謙之樂同年而語哉大抵樂律樂章本爲二道由宋以降樂章屢易而所用者皆王朴之律也政和以降樂章屢易而所用者皆漢津之律也至冷謙定樂樂章無改而所用者則非宋元之律也改其律而不變其章者聲音道微政合嚴重律正其元曲襲其舊此謙之所以爲明哲也謙舊有樂書在南太常

函史曰李教授文利祖呂氏春秋三寸九分爲黃鐘曰含少之文辨黃鐘九寸之誤以太極陰陽五行繇

一生二繇少及多見黃鐘數少爲極清辨宮聲極濁之誤以左右對待各得百二十九分辨三分損益上生下生至仲呂而窮之誤其法由十一月黃鐘三寸九分至十二月大呂則增六分由大呂至太簇夾鐘姑洗仲呂蕤賓皆各增九分由五月蕤賓至六月林鐘亦減六分由林鐘夷則南呂無射應鐘以復於黃鐘皆各減九分而適合三寸九分之數由此而如環無端焉以相生其說曰陽數始於一成於三終於九故律之爲數三九盡之矣黃鐘一陽初升氣微數少

故其管三寸九分三寸乃陽數之少九分乃陽數之成以三涵九故黃鐘之宮命之曰涵少此其證也十一律皆從以生而增減亦各以九分惟黃鐘之於大呂蕤賓之於林鐘其增減視他律特異者大呂當五陰之盛一陽始生則陽雖進而尚弱林鐘當五陽之盛一陰始生則陽雖退而尚強其增減宜僅得三分之一也律管長短一本陰陽升降之氣所謂律歷同道者也作律呂元聲書二篇范副使輅等信其說從受學楊學士廉愛其書以爲天授而王尚書廷相韓臆見卜度決也

尚書邦奇皆大儒通解音律皆不謂然以爲樂律首調之承傳在中原依古往而來非他方及知非可以臆見卜度決也

楊忠愍繼盛爲韓苑洛志樂序世之談經學者必稱六經然五經各有專業而樂則滅絕無傳論治法者必對舉禮樂然議禮者於天然不易之外猶深求立異可喜之說至於樂則廢棄不講全德之微風俗之敝恒必由之良可悲夫然律呂與天地相爲終始方其隱而未彰也天旣生哲人以作之則於其旣晦也

天忍任其湮沒已乎闖窮之責蓋必有所寄者先生
自做秀才時便抱古樂散亡之憂當其歲試藩司聞
諸督學虎谷王公云律呂之學今雖失傳然作者
旣出於吾人則在人亦無不可知之理特未有好古
者究心焉耳先生於是惕然省悟退而博極羣書凡
涉於樂者無不參考其好之之專雖發疽尋愈不知
也旣而見其說矣於是有直解之著然作用之旨未
之悉也自是苦心精思或脫悟於載籍之舊或神會
於心得之精或見是於羣非之中若天有以啓其天

者終而觀其深矣於是有志樂之作曰志云者先生
自謙之辭也非徒志而已也是故律生聲鐘生律馬
遷著之矣而律經聲緯之遞變體十用九之明示則
未之及也圍九分積八百一十分班固著之矣而管
員分方旋宮環轉乘除規圓則未之及也六十調八
十四聲蔡子著之矣而起調則例及正變全半子倍
之交用調均首末長短相生之互見則未之及也六
變八變九變之用周禮載之矣而以黃鐘祀天神以
棗賓祭地祇以太簇享人鬼一造化之自然以黃鐘

一均之備布之於朝廷宮闈是古今之絕唱則又有
出乎周禮之外者也宏綱細目一節萬變信手拈來
觸處皆合樂之爲道盡於是矣志云乎哉其於先儒
世儒之圖論備錄不遺者是固先生與善之心然亦
欲學者者見得失焉耳方其始刻之日九鶴飛舞先
生之庭者久之識者以爲是書感通所致觀仰秣出
聽之說則鶴之來舞也固且而其得樂之正也此非
其明驗矣乎昔人謂黃帝制律呂與伏羲畫卦疇得
程朱數子而始著律呂得先生是書而始明則其功
當不在數子下豈曰小補云乎嗚呼太和在成化字
宙間故先生所由生太和在弘治宇宙間故是書所
由始太和在嘉靖宇宙間故是書所由成則其作誠
不偶然也後之有志於樂者苟能講求而舉行之則
太和將在萬世之宇宙而先生之功至是爲益大矣
然不苦心以求之何以知是書之正不得其說而精
之又何以知盛之言不爲阿私也哉噫盛不敏雖學
之而未能也講求之責深有望於同志君子云

姑蘇王煥如曰周禮太師掌六律六同以合陰陽之

聲播之八音以爲樂器孔子曰易有聖人之道四以制器者尚其象八音者聖人致中和之器也其制之長短廣狹小大輕重皆有數三三迭運九九相乘天地萬物之所生也太和元氣之所鍾也聲律家謂之元聲黃鐘者天地陰陽之和也五聲之本生於黃鐘之律律十有二陽六爲律陰六爲呂律法也律以統氣類物呂侶也呂以助宣陽氣爲道不同其中一也今按黃鐘之長九寸寸積九十分十釐釐十毫二寸忽忽方五十九萬口四百九十萬得寸十寸爲尺十尺曰丈十丈曰引黃鐘之管其容子粟秬黍中者一千二百爲龠十抄抄十撮撮二十圭圭六粒粒凡一千二百得龠十龠曰合十合曰升十升曰斗十斗曰斛黃鐘之龠所容千二百黍其重十二銖兩龠則二十四銖爲兩兩四分分六銖銖十疊疊十黍黍凡二千四百得兩十六兩曰斤二斤曰裏十五斤曰稱二稱曰均四均曰石三之九之損之益之以合陰陽之中以通律呂之和長短廣狹小大輕重以十有二律爲之度數以十有二聲爲之齊皇紀之以三平

之以六成之以十二天之道也凡八音之器莫不以是爲準是以聲出於器器得則聲得器失則聲失也八音惟草木無當於五音不係於律國語曰草木一聲此之謂也其餘六器清濁高下莫不隨器審察而齊一之夫金匪改煎齊量不成石匪旁耑摩鑪不協竹有穴竅疎密之異匏有安山卑崇之殊土惟頰仰啓閉而契歌惟依永比律而和總衆音而言之金欲應石石欲應絲絲欲應竹竹欲應匏匏欲應土而八器之音根祖出一黃鐘器雖萬有不同未嘗不克諧

也祇患僅知七律爲一均而未知度曲之義僅知一律配一字而未知永言之旨耳所謂七律者如以黃鐘爲宮卽以林鐘爲徵太簇爲商南呂爲羽姑洗爲角應鐘爲變宮蕤賓爲變徵其七律自爲一均而聲相諧應古人欲合聲先須吹律使衆音皆合如一律所出乃可近世不解多以黃鐘奏而聲或林鐘林鐘奏而聲或太簇七音之協四聲各有條理今以平入配重濁以上去配輕清奏之多不諧協六器之定琴瑟尤難琴必每調而改絃瑟必每調而徙柱上下相

生其理至妙又琴瑟聲微常見蔽於鐘磬匏革竹土聲長金石常不能以相待矧曠不習開擊鐘磬者不知聲吹匏竹者不知穴操琴瑟者不知絃同奏則啓手不均迭奏則發聲不屬失之遠矣故妙達音律者必於此而斡旋之度律均鐘以耳齊聲以聲定律而訂黃鐘之宮準此中聲均瑟十六聲次第又以十六聲而齊六器聲高者抑而下之聲下者引而上之過不及者損益而酌中之使衆器之間音音翕和不相凌奪然後被之於絲彈者純然如出一手吹之於匏

土者翕然如出一口聲以和樂律以平聲金石以動之絲竹以行之詩以道之歌以詠之匏以宣之瓦以贊之革木以節之合作於一堂之上將見八風從律氣無滯陰亦無散陽風雨時至神民和說制物備而樂成庶幾不失夔曠之遺教云

樂書曰昔太史公爲律書其始不言律而言兵不言兵之用而言兵之偃以爲天下庶富百姓嬉遊此和樂之本也蓋亦深達制律之意者哉樂之用不外乎聲音律呂通典云以子聲比正聲則正聲爲倍以正

聲比子聲則子聲爲半如仲呂之管長六寸五分有奇上生黃鐘三分益一不及正律九寸之數但得八寸七分有奇以爲黃鐘之變律半之得四寸三分有奇爲子聲此聲有倍半之略也淮南子云姑洗生應鐘比於正音故爲和應鐘生蕤賓不比於正音故爲謬蓋五音相生至於角位則其數六十有四隔八下生當得宮前一位以爲變宮又自變宮隔八上生當得徵前一位其數五十有六以爲變徵變者與正比則爲和變者與正不比則爲謬此音有和謬之略也

漢書律歷志天地人及四時爲七始此合而言之也以黃鐘爲天始林鐘爲地始太簇爲人始此分而言之也蓋黃鐘居子爲天統林鐘居未衝丑爲地統太簇居寅爲人統故爲三始姑洗爲春蕤賓爲夏南呂爲秋應鐘爲冬以三合四是謂七始此三始七始之路也以七音因十二律爲八十四調除二變聲不得爲調以五因十二則爲六十調然二變不調則冬夏聲闕四時不備蔡子之說非而鄭譯之議是也此六十調與八十四調之略也以徑象言之黃鐘長九

寸爲乾林鐘長六寸爲坤乃邵子皇極經世聲起於多乾之甲也音起於古乾之子也此理之可通於易者也以娶妻生子言之黃鐘爲陽大呂爲陰猶甲子之娶乙丑皆同位者也黃鐘之生林鐘林鐘之生太簇猶甲子金之生庚辰金皆隔八者也乃沈重鍾律議用京房之術求之得三百六十律當一期之日隨日建律依次運行當日者以天爲宮而商徵以次從焉此義之有符於歷者也樂必用五音然周三大祭皆無商音說者謂周德木也故祭鬼神之樂去金開

元諸臣言唐土德王請加商調去角調以土德王初作洪武正韻聲起於東從角也後見禮部韻會而遵用之不起於東而起於公此則從宮矣豈非深達造化者哉律止於十二是矣然十二者律之本聲而四者應聲也本聲重大爲君爲父應聲輕清爲臣爲子故四聲曰清聲卽夾鐘大呂黃鐘太簇之應也苟不用四清聲是有本而無應矣冷謙議用四清聲故編鐘編磬皆爲十六豈非洞達音律者哉詩稱定之方中謂測日景以辨方也土圭之法祖冲之之論備矣

然候氣者使按日景之子午以布律則氣必不應何也天氣微偏於左地氣微偏於右所謂不參差則不能生物者也故土圭測日景常在子午之中此天之正位也以針定南北常在丙午壬子之中此地之正位也故冬至置黃鐘之律於壬子之中夏至置林鐘之律於丙午之中然後飛灰應律今元定乃欲一室之中多截管以候黃鐘豈非臆說哉黃鐘起於子之一以三倍之應十二辰而終於亥之一十七萬七千一百四十七漢志蓋借十二辰以列三因之算位耳

蔡子乃據以爲真張臯鋪衍謬矣自黃鐘之管陽皆生下陰皆生上自蕤賓之管陽反生上陰反生下此非空言也從子至巳陽生陰退故律生呂言下生呂生律言上生從午至亥陰生陽退故律生呂言上生呂生律言下生蓋班志隔八相生一下一上則終於仲呂其長止三寸三分有奇京房之法至蕤賓重上生凡五十六上終於仲呂其長六寸六分有奇若仲呂止三寸三分有奇雖三分益一不能復生黃鐘之律故用六寸六分則三分益一可以復生黃鐘耳蔡

子乃譏其陰陽錯亂亦未之思耳近世儒者乃曰黃鐘非九寸之管而引外紀呂氏春秋所載含少之說爲証曰黃鐘音始也象則君也其律宜短其氣宜微其聲宜清者也夫黃鐘以八十一分爲管而吹三十九分以爲聲故謂之含少乃遂以三寸九分爲黃鐘之律而執含少以爲清管焉是此律一差大呂而下十一律者皆無由取正矣蓋太史公之言曰細若氣微若聲聖人神而明之雖妙必效今聖王當陽能禁暴戢兵保大定功安民和衆是樂之本也區區之器

與數何足論哉

黃太史道周樂律論樂律史記所載極爲詳悉楊子雲太元只是說厯耳天地之體四方各百二十八周而圍之五百一十二因而圓之四百八十凡方圓相割十有八變而歸於極體四則用三體三則用四以四爲窠以三損益割方卽爲損割圓卽爲益考其纖微皆方不止於徑一周四圓不止於徑一圍三約長餘分是日月差法之所由生也律曆之妙皆於此徑一圍三上察其微差以爲相生之律如黃鐘全律

百二十餘一分七釐有強因而裁之八十有一爲黃鐘之上宮其下宮三十有九餘分不盡以起下生而淮南子呂不韋俱稱黃鐘三寸九分此是訛黃鐘之下宮以爲上宮我朝李文利鄭世子之流又祖其說以三寸九分起黃鐘則黃鐘之聲宜極短而清毋復牛鳴窮中者矣管子亦稱黃鐘有大灑之音此皆於變宮上說黃鐘非就黃鐘本位起實數也如就本位起實數則六律六呂皆百有二十分如大呂七十有二則其餘宮四十有九又有餘分不與仲呂爲亂今

以子未寅酉辰亥午丑申卯戌巳分爲娶妻生子之序上下損益終於南呂之六十而百二十分之律分中所謂律之一終也京房六十律亦從此始如用三寸九分之律則管分極短吹不成聲應不動氣又益五寸二分以爲大呂顛倒極矣某自少時常用文利之律以比於淮南呂覽之說久而知其不然乃復求之史記知太史所藏去古未遠置一而十一三之以三爲實以四爲積不可易也徐州鳩所論六間六正大不踰宮細不過羽從來已舊安得指極短之律以

起至大之宮使鐘量衡度皆無所從始乎凡樂言鐘
呂爲人生致用之大端鬼神所用進退亥爲應鐘卯
爲夾鐘未爲林鐘此三鐘者三甲所治易之先甲三
日後甲三日謂是物也巳爲南呂丑爲大呂酉爲仲
呂此三呂者爲三庚所治易之先庚三日後庚三日
謂是物也黃鐘爲子與亥而從陽治陽者爲主治
陽而主鐘蕤賓爲午與巳從陰治陰者爲客故言
賓而治呂主客之分出入之序六府三事之所爲治
也禮祀天神則用圜鐘爲宮以相次爲序祀地祇則

用兩鐘爲宮以相生爲序祀人鬼則用黃鐘爲宮以
相合爲序其以黃鐘代應鐘亦猶之尊子而紕亥也
凡道之本於禮樂者皆與天行之度一一相追禮退
而紕樂進而盈樂動而升禮讓而反日之讓天月之
讓日進而稱順退而數逆藏往知來其致一也日月
律度之差各十三有餘爲日月交食之會析之爲六
分有半爲律法之所從極蔡元定稱子丑寅卯辰巳
上得全分午未申酉戌亥不得全秒猶未有定論唯
以十二差之自三分九釐損益上下以至於一分而

極而半聲間起之法亦於是而出矣木上云然則太師吹銅聽律以知師之善敗如何某云予非瞽史安知吹律然詩稱其重三軍大國一軍萬二千五百人三軍之數與天地參六師之義倍而用之用衆之律而過於天道未有不敗者也然則律數十有七萬八千餘強何也曰置十而十一三之是大易之偶數也因而三之五十三萬餘強而與天俱周律之與禮樂天道兵師其槩一也

崇禎十五年禮部議覆太常寺樂疏云家諭太常寺

有神樂觀及給賜淨衣取其精潔今郊廟祭樂亦多疏澀如琴瑟並無指法舞容尤乖古制宜訪求知樂之人細加參究因及鄭世子所進樂書及原任禮部尚書黃汝良樂律考大要以黃鐘為主仰見皇上留心於禮樂精微無不洞悉臣等謹察得黃鐘候氣實爲律歷之本而自漢唐以來或爲三寸九分或爲九寸其說不同前議歷法時臣等以古葭灰候氣之法令欽天監與新局並試皆不甚曉至樂舞生則琴瑟搏拊尚未能辨別黃鐘乎周時以舞教國子令

大胥正舞位小胥正舞列節八音而行八風蓋五行之義皆寓於其中至漢大樂律則卑者之子不得舞宗廟之酌凡除更二千石至六百石關內侯至大夫之適子取爲舞生其教之豫而選之精如此以能發揚功德孚格人天而今皆伶人下賤爲之去古寔遠宜令太常倣周漢意選舞士不得仍以倡優充數仍將律書正聲所纂舞圖舞節重加翻習庶足復三代之舊又輔臣奏廟堂上不宜用教坊樂聖意亦以爲然察會典凡祭祀用太常寺樂舞凡朝會宴饗等禮

用教坊司奉繼而相沿既久疎舛成習所當嚴行申飭至古者房中之樂歌關雎詩燕射之樂歌鹿鳴諸詩笙奏由庚諸詩卽漢人樂府亦特爲古雅當時宜容必有可觀自唐始分太常與教坊爲二實鄭聲亂雅之始惜古樂殘缺未易頓議亦宜訪求知樂之人徐加訂定以副聖天子復古致治之盛心

律尺

崇禎十四年上欲考定樂律命工部察周尺之制工部不能定移聞禮部禮部覆云周尺之說古今推求

不一有用累黍者漢書律厯志云以子穀秬黍中者
度之九十分爲黃鐘之長一黍爲分十分爲寸十寸
爲尺爾雅云秬墨黍也顏師古云中者不大不小後
周時牛弘等議曰上黨華頭山黍其色至烏其形圓
重唐禮樂志曰黍真則尺定尺定則律均宋賈儼司
馬光等考定周尺用上黨黍十黍爲一寸是也有用
指者古人按指知寸布手知尺舒臂知尋大禹聲爲
律身爲度用左手中指三節三寸謂之君指裁爲宮
聲之管許慎說文曰中婦人手長八寸謂之咫尺卽

周尺也有用璧羨者考工記曰璧羨度尺好三寸以
爲度蓋璧徑九寸羨而長之縱十寸橫八寸周謂之
度尺則周之十寸八寸皆爲尺也有用粟粟者粟禾
穗芒也淮南子曰律數十二故十二粟當一粟十粟
而當一寸是也有用蠶絲者孫子算術云蠶吐絲爲
忽自絲毫釐分而成一寸是也有用馬尾者易緯以
十馬尾爲分是也詳考之竊謂人指則長短不同璧
羨則古璧難得粟有輕重馬尾有巨細蠶絲秒忽亦
難辨惟累黍之法爲正而又有謂圭璧之屬用指尺

冠冕尊彝之屬用黍尺者又有謂歲有豐歉地有肥磽壘黍較驗亦復不齊者故前代製尺非特用壘黍又必求古器以雜較焉隋書所載歷代之尺十有五種第一種卽周尺與西漢劉歆銅斛尺東漢建武銅尺晉荀勗律尺祖冲之銅尺皆合今去古既遠欲求確據惟我高皇帝時命宋濂冷謙等所定樂律及劉基等所定欽天監晷景可憑而晷景尤其顯者宋和峴用西京銅望臬卽司天臺影表銅臬下石尺也影表上可測天度數不爽况其他乎唐順之曰今欽天

監表尺乃元郭守敬所造比市尺止得八寸強守敬精於律厯決非妄作嘗取壘黍中者一千二百粒日乾之秤量重五錢者以九十粒橫之命爲九寸與表尺果合於今欲求周尺似不能舍是而他求矣抑又有說焉高皇帝創制垂法貽謀萬世當時製爲鎮圭定按周尺莫若以鎮圭之尺爲主若欲別造準尺是必博搜古器如表尺之屬兼求真黍參互考定非可懸虛臆決也工部據以回奏奉旨旣說周尺卽鎮尺著照鎮圭式造尺

審度嘉量權衡皆出於律自積黍之法不明黃鐘之說始紛然如聚訟近代鄧世子考羊頭山拒黍以時等則稱之百粒得二分五釐至兩龔二千四百重六錢則今之六錢爲古一兩以約度量今之八寸卽古一尺今之三斗卽古之一斛度以八爲率量以三爲率權以六爲率

大祀

郊廟社稷先農爲大祀已而改先農及山川帝王先師旗纛爲中祀諸皆小祀大祀致齋三日中祀二日

祀有牲牲四等曰犢曰牛曰太牢曰少牢色尙駢或黝天地日月加玉焉玉三等曰蒼璧曰黃琮曰玉牲大祀入滌九旬中祀三旬小祀一旬殺禮不用牲用果脯從其族或用素羞祀有帛大祀中祀京師用制帛制帛五等曰郊祀曰奉先曰禮神曰展親曰報功小祀素帛禮佛帛玉國司府州縣亦用帛小祀則否凡祀有樂樂四等曰九奏曰八奏曰七奏曰六奏舞皆八佾先師六佾小祀則否凡助祭文臣五品武臣四品以上小祀則否

禮部寅清堂有嘉靖十五年秋欽定大報諸祀禮儀碑每歲大宗伯以大報日期等日告於皇帝前期於本衙門宿鴻臚卿具請御殿及設案奉天殿中是日百官公服侍班皇帝服皮弁大宗伯具朝服自午門中道行捧祀日冊立置於案皇帝就案先立定大宗伯跪奏曰嘉靖幾年分大報等祀日冊請敬之皇帝搢圭取而恭視訖序班舉案於華蓋殿中皇帝陞座百官叩頭如常禮畢

正祀典

倪文毅岳疏釋迦牟尼文佛三清三境天尊謹按傳記西方有佛國曰天竺有五中天竺乃釋迦所生之地後漢明帝時其法始入中國後之宗其教者遂以釋迦爲師其曰三世佛者則以釋迦之本性爲法身德業爲報身并其真身而爲三其是本止一人耳今乃分爲三像而並列之失其旨矣唐儒韓愈有曰三代之時天下太平百姓安樂壽考中國未有佛也明帝時始有佛法其後亂亡相繼運祚不長宋齊梁陳以下事佛漸謹年代尤促惟梁武帝捨身施佛其後

餓死臺城事佛求福乃更得禍由此觀之佛不足事
亦可知矣至於道家以老子爲師其所謂三清者蓋
做釋氏三身而爲之尤爲謬妄宋儒朱熹有曰玉清
元始天尊既非老子之法身上清太上老君又非老
子之報身設有二像又非與老子爲一而老子又自
爲上清太上老君蓋做釋氏之失而又失之者也况
莊子明言老聃之死則聃亦人鬼耳豈可僭居昊天
上帝之上哉由此觀之三清三境天尊實無所據况
躬親祠醮傾心崇奉如宋徽宗者可謂至矣卒之陷
身沙漠覆亡宗社千載之下可爲明戒但緣異端佛
老之徒轉相模倣惑世誣民歷代因之莫之有廢是
以遞年以來凡遇萬壽千秋等節奉欽依脩建吉祥
好事或遇喪禮七七脩建薦揚好事俱先期一日遣
官詣大興隆寺祭告釋迦牟尼文佛朝天宮祭告三
清三境天尊此皆因襲而行不合祀典今議齋醮既
合停止其前項祭告俱各罷免

北極中天星主紫微大帝謹按象緯書有曰北極五
星在紫微垣中一名天極一名北辰其北第五星名

天樞蓋極星之在紫微垣萬星所宗七曜三垣二十八宿衆星所拱爲天文之正中又曰紫微大帝之座天子之常居也卽今朝廷宮殿所在乃其象焉國朝正統初年建紫微殿一所於大德觀之東設立大帝之象每遇萬壽聖節正旦冬至俱遣大臣一員祭告今議得日月星辰並曜於天故古有大明祭日夜明祭月幽宗祭星之文祖宗以來每歲南郊大祀內壇已有星辰壇合祭之禮今乃象之如人稱之爲帝以極星之正祠於異端之宮稽之祀典誠無所據所有

前項祭祀伏乞罷免

九天應元雷聲普化天尊謹按傳記有曰凡陰氣凝聚陽氣在內而不得出則奮擊而爲雷霆非如異端所謂龍車石斧鬼鼓火鞭怪誕之說也雷聲普化天尊者道家以爲玉霄一府總司五雷而雷部諸神皆其所主而又託以六月二十四日爲天尊現示之日故朝廷遂以是日遣官詣大德顯靈宮致祭今議得雷雨風雲皆陰陽之妙用鬼神之盛德祖宗以來每歲南郊大祀外壇已有合祭之禮而八月望後山川

壇復有秋報之祭况自二月發聲之後無非雷霆奮震之日顧乃定於六月二十四日於義何取至於像設名稱禮亦無據所有祭告伏乞罷免

梓潼帝君謹按圖志英顯王廟在劍州卽梓潼神姓張諱亞子其先越篤人因報母讐徙居劍州之七曲山仕晉戰沒入爲立廟唐玄宗西狩追封左丞僖宗入蜀封濟順王宋咸平中改封英顯又按文昌六星在北斗魁前爲天之六府道家謂上帝命梓潼神掌文昌府事及人間祿籍故元加號爲輔元開化文昌

司祿宏仁帝君而天下學校亦多立祠以祀之京師之廟在北安門外景泰五年間闢而新之勅賜文昌宮額每以二月初三日爲帝君誕生之辰遣官致祭今議得道家謂梓潼以孝德忠仁顯靈於蜀廟食其地於禮爲宜祠之京師不合祀典至於文星與梓潼無干今乃合而爲一誠出傳會所有前項祭祀伏乞罷免仍行天下學校如舊有文昌宮者亦合折毀祖師三天扶教輔元大法師真君謹按傳記張道陵字元輔漢光武十年生於吳之天目山善以符水治

病桓帝永壽元年於靈峯白日上昇百一十歲唐天寶七年冊贈太師中和四年封三天扶教大法師宋熙寧中加封三天扶教輔元大法師大觀二年冊號正一靖應真君子孫歷代相傳皆有封號迨入國朝仍令傳襲正一嗣教真人之封秩正二品歲以正月十五日爲祖師示現之辰遣官詣大德靈顯宮告祭又按宋邵伯溫聞見錄建安二十年曹操破張魯守漢中魯祖陵順帝時客蜀學道鳴鶴山中造作符書惑百姓從授其教者輒出五斗米時謂之米賊陵子

衡衡子魯以法相授受自號師君其衆曰鬼卒曰祭酒大抵與黃巾相類朝廷不能討就拜魯漢寧太守鎮夷中觀此則陵本非異人而道家祖陵爲天師者特因天寶詔稱漢天師而然爾今議得正月十五日乃其生辰自宜其子孫祭於其家所有前項祭祀伏乞罷免

大小青龍之神謹按碑記昔有僧名盧自江南來寓西山之尸陀林秘魔岩一日二童子來拜於前盧納之鬻薪供奉雖寒暑無怠時久旱不雨二童子白於

盧能限雨期言訖卽委身龍潭須臾化青龍一大一小至期果得甘雨事聞賜盧師號曰感應禪師建寺設像立碑以記其事又別設祠於龍潭之上春秋遣官祭青龍神國朝宣德中勅建大圓通寺青龍出現禱之有應於是加以封號至今春秋二時遣順天府官致祭及遇歲旱遣官祭告蓋因舊傳二龍能致雲雨故累朝崇奉如此然雖稱二青龍其實蛇也蛇有神蛇其名曰螭亦能致雨今此二蛇西山寺院處處有之畧無靈異近者京師連年亢旱累祭告祈禱

杳無應驗則此亦非螭蛇乃凡蛇耳蓋妖由人興久自衰息無足崇矣昔宋祥符中天慶觀有蛇極怪異人以爲龍孔道輔以手板擊其首死之其患遂息程明道爲上元主簿茅山池有小青龍如蜥蜴崇奉以爲神物明道捕而脯之使人不惑後亦不聞如何則此二蛇之怪誕正此類也所有前項春秋祭告之禮伏乞罷免

東嶽泰山之神謹按圖志東嶽魯之泰山今在山東濟南府泰安州山下有廟自黃帝以來封禪者七十

二君唐宋元皆加神以封號曰王曰帝若祀人鬼國朝洪武三年詔去封號稱爲東嶽泰山之神有司春秋致祭有事則遣廷臣祭告今京師朝陽門外亦有東嶽廟蓋自元延祐中元教宗師張留孫買地爲宮奉祀東嶽齊天仁聖帝國朝仍而不廢歲以三月二十八日及萬壽聖節遣官致祭夫嶽鎮海瀆以其山川靈氣有發生潤澤之功故歷代祀之而泰山在魯封內歲時已有常祀况每歲南郊大祀壇八月山川壇俱有合祀之禮所有前項祭告稽之祀典煩瀆無

據今當罷免

北極佑聖真君謹按傳記北極佑聖真君蓋真武神也真武本元武宋真宗尚道教避聖祖諱改元爲真元龜也武蛇也此本北方元武七宿虛危星形似之故因而名後乃以元武爲真武而作龜蛇於下靖康初詔加號助順曰佑順助聖真武靈應真君及考圖志乃云真武爲靖樂王太子也生而神靈長而勇猛志除邪魔遇紫虛元君授以道秘東遊遇天神授以寶劍入武當山修煉功成白日飛昇奉上帝命往鎮

北方披頭跣足建皂纛元旗統攝元武之位此則道家傳會之說殊爲誕妄再考國朝御製碑文太祖高皇帝平定天下兵戈所向神陰祐爲多及定鼎金陵乃於雞鳴山建廟以崇祀事載在祀典太宗文皇帝肅靖內難以神有顯相又於京城良隅并武當山各重建廟宇而兩京歲時春秋及京師每月朔望各遣官致祭武當山則命內外官員專一在彼提督列聖崇奉之意可謂至矣憲宗純皇帝在位常范金爲像遣內官陳善齋往武當安奉蓋亦不過承先志以祈

神庥耳豈期陳善援引左道之人鄧常恩等上則熒惑聖聽糜費內帑下則騷擾道路虐害生民且又奏請重修京師廟宇改號靈明顯佑宮日居其間引進邪術遂使香火之地幾爲姦盜之區固非朝廷崇奉之本意使元武有神亦豈其所樂聞哉今議得神既有功於國則累朝崇奉之禮固不可廢但本以一人而一歲之間兩京俱有春秋之祭京師復有朔望等祭過於煩瀆合無照依南京洪武年間以來例應每年三月初三日九月初九日各用素修遣太常等官

祭祀其餘祭禮并行停止其武當山神像之類頻年齋送不無太繁況已有內外官員頌勅在彼一應供奉之物自合責令各官嚴加整辦所有襄陽府縣三年一次額辦給散道士澗白綿布二千四百疋澗白苧布二千四百疋祀神油蠟香燭三萬七千八十四斤雖稱送日久皆係正稅所出即今民力億徵亦宜量爲裁革減省合行湖廣巡撫巡按官員徑自勸量奏請定奪今後差遣內官鑄送神像等事並乞一例禁革庶幾神祠不替而國用少節矣

崇恩真君隆恩真君謹按道家之言有曰崇恩真君姓薩氏諱守堅西蜀人在宋徽宗時嘗從虛靖天師張繼先及王侍宸林靈素傳學道法累有靈驗而隆恩真君則玉樞火府天將王靈官也又嘗從薩真君傳授符法國朝永樂中有杭州道士周思得以靈官之法顯於京師附體降神禱之有應乃於禁城之西建天將廟及祖師殿宣德中改廟爲火德觀封薩真人爲崇恩真君王靈官爲隆恩真君又建一殿崇奉二真君左曰崇恩殿右曰隆恩殿成化初年改觀曰

宮加顯靈二字遞年四季更換袍服三年一小焚化
十年一大焚化又復易以新製珠玉錦綺所費不貲
每年萬壽聖節正旦冬至及二真君示現之日皆遣
官致祭其崇奉可謂至矣今就其言議之薩真人之
法因王靈官而行王靈官之法因周思得而顯其法
之所自皆宋徽宗時林靈素輩之所傳一時傳會之
說淺謬如此本無可信况近年附體降神者乃欽發
充軍顧珏顧綸之父子其爲鄙褻尤甚往往禱雨祈
晴杳無應驗則其怪誕可知但經累朝創建一時難

便廢毀所有前項祭告之禮俱各罷免其四時袍服
宜令本宮住持并庫役人等於每年應換之日仍會
同道籙司掌印官照舊依期更換如法收貯不必焚
化永爲定例伏乞勅內府衙門以後袍服等件不必
再行製造如此則國用不至於妄費而邪術亦可以
少貶矣

金闕上帝玉闕上帝謹按大明一統志福州府閩縣
南舊有洪恩靈濟宮一所祀二徐真人卽今之金闕
玉闕二真人也真人五代時徐溫子曰知證封江王

知諤封饒王常提兵定福建父老戴之圖像以祀宋
賜今額又考之御製碑文云太宗文皇帝臨御之十
有五年適遇疾弗愈百藥罔效或有言神靈驗者禱
之輒應脫然平復於是大新闢地廟宇命有司春秋
致祭歲時易衣給戶洒掃又於京師立廟以祀之加
封金闕真人玉闕真人十六年又加封金闕真君玉
闕真君賜廟額名洪恩靈濟宮正統初年重新宮宇
進號金闕崇福真君玉闕隆福真君成化二十二年
重加尊號伯曰九天金闕總督魁神洪恩靈濟慈惠

高明上帝仲曰九天玉闕總督是神洪恩靈濟仁惠
宏靖上帝遞年以來每月朔望并萬壽聖節元旦冬
至及二真君誕辰俱有祭祀遣官行禮及時食獻新
至今不缺四時已有皮弁冠大紅紗羅紵絳織錦雲
龍朝服近又加以平天冠明黃紗羅紵絳衣服其黃
服五年一次更換紅服十年一次更換焚化夫神之
世系年代可考如此本非有甚異也先年只因有功
於闡廟食一方後以保護太宗文皇帝聖躬故京師
有別廟之奉祀但本處既有春秋二祭而京師一年

之間復有前項數次祭祀不無煩瀆且惟皇上帝王
宰於天而兄弟並稱上帝其為僭擬可知至袍服等
件在京更換焚化差遣內官前往福建齋送道路騷
擾虐害人民不可勝言今議得廟之創造既始於閩
則神如有靈固當往來於閩所有福建舊時祭祀宜
仍其舊其京師聖節并朔望等項祭祀及時食獻新
俱乞罷免若有廟無祭為嫌則於二直君誕辰各
遣本宮住持致祭一次仍乞革去帝號照依永樂年
間加封事例止稱真君冠服仍用本等服色在京者

聽令本宮住持廟戶人等於每年應換之日會同道
錄司掌印官依期更換如法收貯不必焚化直待敝
壞之日方許奏請更製將不堪者照舊火焚其在福
建者亦同此例但遇有敝壞者聽令布政司督屬就
彼處置修理以後再不差人前去永為定例所有現
在平天冠明黃袍服責付本宮庫內收貯仍行內府
各該衙門無得再行製造如此既不失報功之典而
祀亦不至於煩瀆矣

神父聖帝神母元君金闕元君玉闕元君謹按徐仙

真籙及國朝御製碑文神父母者卽二真君之父
母金闕玉闕元君者蓋其配也宋理宗朝封父齊王
爲忠武真人母白氏仁壽仙妃配許氏助順仁忠仙
妃陶氏助善慈懿仙妃國朝永樂中加封父翊亮真
人母淑善仙妃許氏真應仙妃陶氏恭靖仙妃繼又
進封其父爲真君成化二十二年神父加封高上神
主慈悲聖帝神母加封安寧護國恭靖元君金闕妃
天房衛保節靖元君玉闕妃天房衆母顯祐元君每
歲萬壽聖節正日冬至俱遣官致祭而金闕玉闕君

前又有誕辰之祭皆二真一時禱應之功故推及而
崇奉之如此今議得神父徐溫乃五代時誤國專權
弑主殊無功德祀以報功豈宜濫及况父母并妃並
受隆名稱帝稱君僭擬益甚所有名號乞照永樂間
封者爲正以後加增一切祭祀俱各罷革

京都城隍之神謹按易坎卦有曰王公設險以守其
國蓋謂人君者觀坎之象知險不可陵也故設爲城
郭溝池以守其國以保其民人傳記謂其制自黃帝
始歷代建國必有高城深隍上以保障宗社朝廷下

以衛捍百官萬姓其所係甚重其爲功不小故國朝之制天下府州縣皆有城隍廟之祭京都城隍廟舊在順天府西南累朝皆加修葺歲以五月十一日爲神之誕辰及萬壽聖節各遣官致祭夫廟祀城隍之神本非人鬼安得誕辰可謂謬妄况每歲南郊大祀壇八月山川壇俱有合祭之禮事體已重此與天下府州縣之祭不同所有前項祭告煩瑣無據俱各罷免奉旨是

商文毅賅諫祀玉皇疏竊惟聖上嗣守祖宗大業十

有三年夙夜憂勤圖惟治理天下之人無不感仰聖德視前代嗣統之君遠過萬萬是宜天道協和雨暘時若休徵畢應而妖孽不作也夫何近年以來災變日多去歲宮門火災秋大雨水一冬無雪今春嚴寒河水重結郊祀之際大風怒號二月朔望日月連蝕南京地震陝西天鳴卽日又有妖物害人之異此皆陰盛陽微非常之變也夫天道不遠感召在人觀此則今日人事之不修政德之有虧軍民之怨困莫伸國家之事變叵測不言可知此誠皇上側身脩行之

時所宜深省遠慮以安宗社爲念增修德政講求闕
失疎遠私昵節省冗費以回天意可也臣等又惟人
君應天以實不以文事神以誠不以物祖宗創爲郊
祀之禮每年一次舉行極爲慎重邇者臣聞皇上推
廣敬天之心又於宮北建祠奉祀玉皇取郊祀所用
祭服祭器樂舞之具依式製造并新編樂章命內臣
習之欲於道家神降之日舉行祀禮臣竊詳皇上爲
此非有他故無非上爲母后祝釐下爲生民錫福用
圖保安宗社於萬萬年之久聖心誠敬人所共知但

稽之於古未爲合禮昔傳說之告高宗曰黷於祭祀
時謂弗欲禮煩則亂事神則難釋之者曰祭不欲黷
黷則不敬禮不欲煩煩則擾亂皆非所以交神明之
道也况天者至尊無對尤非其他神明可比事之
禮宜簡而不宜煩可敬而不可黷乃別立玉皇之祠
祀并用南郊之禮樂則是相去一月之間連行三祭
未免人心懈怠誠意不專且郊祀所用執事并樂舞
生皆神樂觀道士爲之謂其離族出塵清心寡欲刑
喪病疾之人一切不預祖宗制禮蓋有深意存焉皇

上爲天之子其於事天之禮豈可不斟酌典故而致有纖毫之不謹乎臣等伏望聖明將前項神祠停罷神像送宮觀侍奉祭服祭器樂舞之具送太常寺收貯凡內庭一應齋醮之事悉宜停止今後聖節等項脩齋悉照舊例施行勿爲褻瀆庶幾天心昭鑒可以變災而爲祥轉禍而爲福宗社萬萬年無疆之慶端在於此

徐文靖溥諫祀三清疏近司禮監傳示聖諭遞出祭三清樂章令臣等改補進呈臣等謹按天子祀天地

天者至尊無對盡天下之物不足以報其德惟誠意可以格之故禮以少爲貴物以簡爲誠祭不過郊郊時不過孟春牲不過一牛蓋祭非不欲頻頻則反黷物非不欲豐豐則反褻書曰黷於祭祀時謂勿欽禮煩則亂事神則難正此謂也漢祀五帝儒者尙非之以爲天止一天豈有五帝况三清者乃道家邪妄之說謂一天之上有三天帝至以周時柱下史李耳當之是以人鬼而加於天之上理之所必無者也若夫樂器之清濁樂音之高下有制度有節奏毫釐之際

不容少差。差則反以召禍。况製爲時俗詞曲以享神明。褻瀆尤甚。以此獲福。又豈有是理哉。我朝天地合祭。祭用正月。皆太祖所親定。樂器樂章。皆太祖所親製。足以傳之萬世。當此之時。豈有三清之祭。俗曲之音。今所遞出樂章。雖云出于永樂大典。蓋是書之作。博采兼收。欲以盡天下之事。初未聞以此施之朝廷。見諸行事。以爲後世法也。陛下純誠至孝。嗣統守成。一以太祖爲法。以上追二帝三王之盛。不宜黷禮事。大臣等讀儒書窮聖道。家邪妄之說。未嘗究心至

於鄙褻詞曲。尤所不習。不當以非道事陛下。所以連日寢惶。不敢奉命者。寔不願陛下此舉也。且古之帝王。必資輔弼。以成治化。舜大聖也。其命禹之辭曰。子違汝。弼汝。無面從。伊尹之告太甲曰。有言逆於汝心。必求諸道。蓋惟恐臣之不盡言也。仰惟祖宗所以置文淵閣。簡命學士居之者。寔欲其謀議政事。論講經史。培養本原。弼正闕失。非欲其阿諛順旨。惟其言而莫之違也。臣等待罪此地。積歲累時。今經筵早休日。講久曠。異端邪說。得以乘間而入。此皆臣等講讀不

勤輔導無狀不能事事規正以啓陛下之聖心保陛下之初政憂愧之至無以自容近數月來凡奉中旨處分其合理者自當仰承德意不敢違越聞於民情有干治體相礙亦不敢苟且應命以誤陛下未免封還執奏至再至三迹似違忤情寔忠愛似此者多伏願陛下垂日月之明廓天地之量俯加鑒察曲賜依從臣等益當勉策駑鈍庶幾少有裨益非但樂章一事而已

劉文靖健革除濫祀疏今月十七日冬至節靈濟宮

祭金闕真君玉闕真君奉旨遣尚書李東陽行禮臣等切有愚悞謹昧死爲陛下陳之佛老二教聖王所必禁儒者所不談中世以來正道不明人心久溺如秦如皇宋徽宗好仙漢楚王英梁武帝好佛唐憲宗仙佛俱好求福未得皆以得禍載在史冊事跡甚明若靈濟宮所奉二真君乃南唐徐溫二子知證知謬謹按正史所載徐溫養子知誥篡僞吳王楊氏諸子皆爲節度使知證天死知謬病死五代石晉時無故立廟稱之爲神國朝雖有廟宇然亦止稱爲真人合

道士供奉香火成化末年加爲上帝禮官失職不能
規正先帝初年革去帝號天下傳聞以爲聖政真君
舊稱尚未盡革至於神父神母仙妃皆是僭叛家屬
濫冒美名尤爲非禮每歲三大節分官祭祀不知何
時復遣內閣儒臣等初承遺命未敢固違因循至
今勉强從事恭遇孝宗皇帝崇儒訪治舍己聽言方
欲具奏論列而龍馭上昇徒深悵慕近者文華殿所
供佛像有旨令臣等撰文祝告臣等以爲事關治體
據理上陳荷蒙聖斷即時撤去仰見陛下聰明正大
遠過百王善推所爲雖堯舜之治不難致矣靈濟真
君生爲叛臣死爲逆鬼而冒名僭禮享祀無窮惑世
誣民莫此爲甚臣等讀聖賢書當勸陛下行帝王之
道心知邪僞而身與周旋則講讀者皆爲虛文輔導
者更爲何事且有其誠則有其神無其誠則無其神
縱使有之亦須誠心對越乃能感格臣等心旣不信
誠從何生強使驅馳雖祭無益若先師孔子遣祭舊
規臣等自當竭誠奉命其一應寺觀祭告自來並不
干預伏乞聖明洞察俯聽愚言將前項祭祀通行革

罷免令臣等行禮先帝革號於涖政之初陛下革祭於嗣位之始傳之後世於前有光庶祀典不愆治體無累而臣等瘵官失職之咎亦少遺於萬一矣

內閣楊廷和請停齋醮疏夫齋醮之事乃異端邪說誑惑時俗假此名目以爲衣食之計佛教三寶道家三清名雖不同其實同一虛誕誣罔聖王之所必禁在昔梁武帝宋徽宗崇信尊奉無所不至一則餓死臺城一則累斃金虜廟社邱墟生靈塗炭求福未得反以召禍史冊所載其跡甚明若使二君當時左右

隨侍皆得正人何至受禍如此哉二君且未暇詳論只如近日劉瑾建元明宮錢寧建石經山祠張雄建大慧寺張銳建壽昌寺于經建碧雲寺張永建隆恩宮所費益銀不可勝計其心本欲求福也然皆身被誅竄家底敗亡略不蒙佛與天尊之庇佑由此觀之則其不足信也明矣夫何讒邪小人公私眩惑不遵祖宗法度不畏天下議論至使宮闈之內修建齋醮萬乘之尊親詣壇場上惑宸聰下誑愚俗以爲福田可種利益可求災患可除祥瑞可致不知年來遠近

亢旱風霾災變彼何不誦一經不念一咒以消弭之乎南北直隸山東河南流賊往來焚劫殺戮彼何不驅神兵鬼將以掃平之乎陛下試以此驗之則其無益有損不待辨矣况陛下親蒞壇場行香拜錄亦甚勞矣何不移之以御講筵修設齋醮糜費錢糧亦甚多矣何不移之以賑窮困正道異端不容並立心既繫於彼則必不繫於此邪說既入聖賢之經訓自疎播之天下傳之後世其爲陛下聖德之累不少非止虧損聖治耗盡民財而已

宗伯夏言議瘞佛疏比者恭遇皇上詔及羣臣欲除去禁中釋殿奉建兩宮以備一代之制一時廷議翕然仰贊皇上篤養盡制之孝闢邪崇正之化盛德大業光前振後已今月十一日伏奉聖旨命大學士李時同臣言入看卽所謂大善殿者臣等看得殿內有金銀鑄像鉅細不下千百且多邪鬼淫褻之狀伏惟聖明燭其誕妄不經一旦奮然舉而除之甚盛舉也但臣見諸几案之上及懸度梁栱之間與夫金匱之所藏貯者爲物尚多不可識辨問之守者且云是爲

佛骨是爲佛牙枯朽摧裂奇醜穢計不下千斤臣
惟佛法之入中國自漢明帝時始然不過人誦其書
習其教而已至唐憲宗朝乃迎佛骨至京師其臣韓
愈上表極言其邪穢不祥不宜以入宮禁憲宗不能
聽且深憂愈竟遠斥之臣意自是厥後人莫敢矯其
非凡番僧持以誑惑中國之人而名爲佛顛佛骨者
相屬於道由是流入天子宮禁之內歷世皆然而不
以爲異今殿中所有未必非勝國所遺國朝以來亦
必以爲彼法則然未嘗深究以延至今茲者恭惟皇
上躬堯舜禹湯文武之資行堯舜禹湯文武之道始
議撤佛屋毀除穢像使詭異之形不得瀆留清禁此
真卓越千古之見出於尋常萬萬者也然殿宇像設
旣除所有前項佛頭佛牙之類皆屬污穢不宜使之
尙存臣請乞以此物勅下所司瘞之草野一切掃而
淨之以杜愚冥疑惑之端實爲大聖人非常作爲有
補名教甚大功德固極臣不勝幸甚後世幸甚疏入
答曰大善殿所貯佛骨諸不經之物瘞之草野恐後
日好事之人仍爲瞻視不如焚之以杜永患遂命禮

部俱於城外焚之

宗伯沈鯉折毀寺觀疏看得戶部尚書王遴條議要
將近日私創寺觀菴院盡數拆毀僧道年四十以下
無度牒者盡數驅逐歸農流寓者遞歸本籍土著者
收入里戶白蓮羅道等會惑眾糜財者悉從重懲治
一節爲照異端之術足以惑世誣民苟非禮教素明
未有不蠱於福田利益之說者在昔已然其風猶未
甚也邇來遊手遊食之輩布滿中外此倡彼和莫可
收拾以致梵宇琳宮星列碁布而無知之民約會進

香建幟號佛者日充斥於道途豈直民財糜費上虧
惟正之供且風俗漸偷釀成地方之禍臣等目擊茲
弊方欲申飭今尚書王遴條奏及此深得移風易俗
足國裕民之計相應酌議題請恭候命下移咨兩京
都察院轉行五城內外及天下司府州縣地方大小
寺觀菴院除係古刹及奉有欽依建置昭舊存留聽
其焚修外若係近日私創菴院招集僧尼瀆祀不經
者悉行折毀入官以後再不許新立增置違者依律
問遣僧道曾經給有度牒年四十以上者昭舊存留

其年四十以下未經給度牒者查果戒行無礙姑准查照見行事例申送納給度牒如不行給度牒削剃不守清規與流寓遊食之徒一併驅逐原籍務農當差一切白蓮羅道募緣僧道及約會燒香頭戴甲馬口稱佛號等項愚民在內聽緝事衙門在外著巡邏員役嚴加禁捕務得會首倡率之人依律枷號治罪知情故縱者罪亦如之勿視虛文務臻實效然臣等猶有過計者夫禮之禁於未然者易爲力而已然者難爲功查得僧道之禁節經言官建白本部議覆不

啻三令五申矣而齋醮施捨會員愈熾俾異端者流安坐而享富厚豈盡左道之愚人抑亦崇尚者之自愚耳崇之於彼而欲禁之於此猶聚糧而去蠅增薪而止沸耳其將能乎今宜於禁令之外仍以禮教隄防之乞勅各撫按嚴督各該守令毋專以簿書期會爲急而務以移風易俗爲要申明聖諭勸化愚民教以君臣父子之常道示以農桑衣食之恒業曉以惠迪從逆之實理喪葬必依家禮有擅作佛事者必罰祈年必於方社有揭榜消禳者必罪大經既正邪慝

漸消行之既久果於風化有裨不爲俗吏吏部開著
上考脫有奉行未至亦宜罰治以示剴懲庶幾教化
與法制並行民風與世道咸賴矣奉神宗旨各處寺
觀菴院除古刹及勅建有名的照舊存留其餘私創
無名禪祀不經的兩京著五城御史在外撫按官嚴
行稽查應改應毀酌量區處具奏餘依擬

禮部侍郎蔣德璟糾張真人疏臣惟古帝王天保佑
內采薇治外治內在省刑薄賦以固民心治外在選
將練兵以鞏國勢並無所謂異教也比者敵寇交訖

民不聊生幸皇上神武英斷清理冤獄蠲免舊逋近
復再行親耕勸農頒詔民始有再生之望而於邊腹
二寇宵旰惓切中外翹首並見廓清乃有真人張應
京乞渙發三官徽號一疏則臣等不能無駭者據道
藏並無三官之說近世始有之其經以天官地官水
官爲陳子椿之子有無不可知然既經晉號而應京
復請齋諭中外一體遵奉共奉慶賀則不惟例所不
載其意欲以何爲得無借以簧鼓愚民使之奔走供
奉以爲利乎抑幾倖差遣招搖誑耀以爲名乎近年

異教盛行游惰姦民棄農不務逃入二氏之徒脫編戶口消滅丁糧不啻千萬別有白蓮無爲等教夜聚曉散所在充塞若復許之慶賀其惑亂尤忍言者漢末之黃巾以妖術授徒及應京之祖道陵以五斗米設教是也道陵舊事姑不深言自晉及唐其子孫並無封號宋崇寧年始賜號張繼先爲虛靖先生亦並無品級至元始加真人稱嗣天師高皇帝以天豈有師斥之且以清理釋道二教責之臣部大哉聖謨一洗元人之陋矣應京酒肉俗流前春祈雪不效而

歸此來沿途祈雨亦不效反以得雨誑告蓋與誦華嚴經咒蝗者並笑破天下之口而尚久戀京邸耗蠹不訾長愚民左道之心短邊兵血戰之氣無益有害斷可知矣似宜急逐歸山以清輦轂至其妄瀆宸聽容臣等照左道惑衆例依律究處伏乞聖斷施行禮部諫殤王不宜加道號疏爲傳奉事祠祭清吏司案呈崇禎十三年十一月十三日奉本部送該內府遞出揭帖奉聖旨皇子悼靈王追贈爲孺孝悼靈王通元顯應真君禮部擇日具儀來行欽此欽遵傳

奉到部送司案呈到部恭照皇五子孝敬性成神靈
天授誠爲千古希邁皇上以孺孝二字弃於王封用
表岐嶷而復賜以道號盛典也亦異典也臣等方手
額讚嘆豈敢復有異議但臣部歷稽職掌所載冊封
典禮皆有王號而無道號蓋王號以世法垂儀闡懿
易名皆古今共遵之典道號以神道設教元感靈通
實不可思議之事皇五子儼然王也自古帝王至德
要道未有不以孝爲首稱皇上以儒道治天下表章
孝經垂訓萬世而皇五子年甫五歲孝本生知誠有
成立屏藩所不能及者稱爲孺孝悼靈王傳之中外
洵足光昭孝治惟是追封真君之儀遍察大明會典
集禮國朝典彙正續文獻通考杜佑通典及本部職
掌等書皆茫無可循臣等禮官也禮所已行者自當
恪爲遵依仰成懿美若其未經行者亦不敢擅自擬
擬致有垂違萬一使好異者以臣部爲嚆矢而循常
者復以臣部爲射的則臣等之罪大矣

章服

學士宋謙議欽儒有議章服之制者其言曰公之服

山龍華蟲火宗彝五章在衣藻粉黼黻四章在裳五章則五列也四章則四列也四列之外雜以雲采間之禮官駁之曰九章之名則是也其謂五列四列則歷代之制無有也非也自軒轅氏肇爲章服有虞氏從而明之各章或一或兩而已惡取所謂五若四哉假使其言可行則天無二日天子之服當繪三辰無乃有數日乎劍三辰者威法天而成章雲亦天物也設用以間之無乃又益之以一章乎蓋曲說之無據者也是未可信也宋濂曰禮官之議皆傳經而辨善

則善矣至謂歷代之制無有則不能以降其心也竊按唐制袞冕之服衣繪而裳繡自山龍而下每章一行爲等每行十二夫行猶列也天子之衣旣云每章分爲十二則公之服似可以類推但不知五四之分又別何所見也若自山龍而下始然則日月星者必仍其舊而無所加強誣天子之章當有數日亦不能通矣又按宋制章服並織成間以雲采而補其空地夫間以雲者不過藉爲文章而周飾之亦非益之以一章也由是觀之歛儒其果有據乎無據乎若不

待知者而後決所可憾者好奇之過舍先王之法壞
侈靡之習迫於六代極矣至有議畫鳳於袞以示差
降飾圓花於裳而云於禮無礙者况於唐宋之世哉
豈惟袞衣爲然也冠冕之制古者以乘藻爲旒前後
邃延延冕上覆也元表纁裏後世則用龍鱗錦表綴
玉爲七星旁施犀犀金絲網之屬又外作翠旒使碧
鳳銜之古者以旒數爲降殺極於十二而止後世則
或增爲二十四焉使歛儒舉以爲言則羣起搯其吭
矣不觀其會通而遽斥人以曲說豈亦可哉然則將

安從之曰章服當準有虞氏之制古之人有是言也
宜以禮官爲正

嘉靖中上諭張孚敬曰茲者光澤王奏請冠服之式
以便遵服朕已允其言今思其製當以燕弁爲準親
王用九袞世子郡王用八袞郡王長子用七袞俱去
簪與五玉後山皆二扇爲之分畫爲四服用青身青
緣前後方龍補各一身用素地邊用雲常用青衣綠
裏履用皂白襪其補子郡王以上許綵粧郡王長子
止許織金爲之未知可否卿其詳看來聞張孚敬回

奏云臣謹按國朝定制天子冕冠十二旒皮弁十二
縫皆象十二月也今燕弁十二縫正如其數又親王
冕冠九旒皮弁九縫今燕弁宜用九祿親王世子冕
冠八旒皮弁八縫今燕冠宜用八祿郡王冕冠七旒
皮弁七縫燕冠亦用七祿茲聖諭世子郡王俱用八
祿郡王長子用七祿竊謂郡王冠冕皮弁旒俱用七
旒七縫今燕冠若同親王世子八祿恐燕服之制獨
於公服等數不合或宜用七祿庶與冠弁之數相合
其郡王長子或宜殺用六祿自鎮國將軍以下各依

原忠靖冠品官之制服之可也又思燕弁冠服及忠
靖冠服俱欽定名今諸王冠服宜更定名伏乞裁示
上曰卿回奏具見詳明夫朝冠公服止於七數閒常
所用反重之可乎郡王之冠仍宜七數其郡王長子
旣無冕弁只可同鎮國將軍之制可也惟冠五祿以
分等差一如忠靖之制式又其名當異於朝廷庶別
天子諸侯也或名之曰保和曰盡義字敬請用保和
從之

崇禎庚辰上傳禮部令百官燕居皆用世廟所製忠

靖冠服賜閣臣五人一襲復以二襲下部爲武

上燕弁冠元端服襯以深衣素帶元履冠用烏紗上
分金線十二瓣前飾五采五雲各一後列四山雙玉
簪服卽古元端制身用元邊緣青兩肩繡日月前
蟠圓龍一後蟠方龍二邊加龍文八十一領與兩祛
共龍文五九祗同前後齊共龍文四九深衣黃色
袂圓祛方下齊負繩及踝十二幅素帶衣畫表
綠緣邊腰圍飾以玉龍九片元履朱緣紅纒黃紵
襪用白

喜齋明齋錄

卷三十九

五

考衣服之制漢天子冠通天冠服袞龍袍唐冠翟善
冠服赭黃袍宋一大裘冕二袞冕三通天冠絳紗袍
四履袍五衫袍六御閱服洪武中學士奏古者五冕
祭天地宗社諸神各有所用請製之上曰五冕禮太
繁察天地宗廟服袞冕社稷等祀服通天冠絳紗袍
洪武乙酉賜各朝臣袍帶凡二千八百一十三人禮
部奏雅唐制服色皆以散官爲準元制散官職事各
從其高者故服色亦因之今各官服色宜依所授散
官與唐制同

百官衣服自十月初四日至次年三月初三日穿紵絲自三月初四日至四月初三日穿羅自四月初四日至九月初三日穿紗自九月初四日至十月初三日穿羅俱司禮監預題以中旨行之

孝宗時合禮部申禁服色閣臣請厲禁花樣上諭若鱗龍飛魚斗牛皆不許用亦不許私織間有賜者或久而損壞亦自織用均爲不可又諭云黃紫皂是正禁若柳黃薑黃等色皆須禁之又諭元色可禁至黑綠乃人間常服不必禁但內人不許用文職官讀書

明理猶不敢僭內官不知道理多僭要嚴加緝訪閣臣王錫爵請傳戴煖耳跪臣伏見連日雪後風寒異常百官尚未蒙恩傳戴煖耳在聖主或深居煖閣不知外寒在微臣則厯事先朝頗諳舊典蓋祖宗二百年來歲傳煖耳示體恤於等威之外乃故事中之特恩所以百官傳衣不謝而傳煖耳獨謝此燔肉醢酒之類物微禮重古人以此窺君心之取舍驗政事之勤替不可忽也大抵人臣有不公不法之罪寧峻其譴訶之法不可無故而賤厭若無故而賤厭則重

道義識廉恥之人日遠而讒諂面諛厮與牧養之人日近臣竊懼焉爲此不憚瑣屑具揭上請伏望皇上少思足寒之傷心毋愛餼羊而廢禮臣等幸甚四方聞之亦幸甚

宗室

馬文升保全宗室疏竊惟親莫親於宗室法莫嚴於祖訓宗室奉藩循理恪遵祖訓者朝廷親親之恩爲益篤縱欲敗度有違祖訓者朝廷黜罰之典所必加昔周武王克商之後以其弟管叔蔡叔監殷後二叔

挾殷之武庚以叛流言以傾王室故周公奉命東征誅管叔而囚蔡叔孔子恕之鄭莊公弟叔段母寵愛之莊公不早防閑封之於京縱彼所爲候其惡深舉兵伐之如克常人春秋譏之一則事於宗社而示天討之公一則不預防閑而虧親親之義或恕或譏此天下至公之法而萬世之所不可易者也洪惟我太祖高皇帝天生聖武祛除胡元奄有中夏掃一時之陋俗回百代之醞風功德之盛遠符堯舜有非後世之所能及故本枝繁衍亦非前代之所能比封建諸

王藩屏王室藩王之子封爲郡王郡王之子襲封郡王諸子俱爲鎮國將軍以漸而降世爲奉國中尉藩王府內官設承奉正副各一員典寶典膳典服各所正副各一員內使六名各門正門副各一員內使司樂二名司弓矢二名外官設長史司左右長史二員典簿一員其餘審理典膳奉祀典寶紀善良醫典儀所各有正副官二員伴讀四員教授一員內外各設官以理一國之政彼時俱遴選才識老成之人以充其任而輔導之方甚嚴王若有過先責輔導官員所

以各王讀書樂善保守其國而稱賢王者甚多縱欲敗度而被黜罰者間有自正統年間至今除秦晉蜀襄淮德吉徽崇等府并新封興岐等府內官不缺外其餘王府內官有缺不行具奏有一府止有承奉一員者甚至全缺不補者宮門有傳事多係女人其他郡王府亦無火者往來傳事俱係外人凡百出入尤無禁忌雖有藩王其郡王并將軍有係尊屬或族屬頗疎者雖知所爲非禮不敢戒諭輔導官員不敢諫正其鎖巡三司官懼其妄奏欺侮離間差官勘問亦

不敢具奏所以肆其所爲有潛蓄異謀而恣淫不道者有強擡軍民子女而打死人命者有骨肉相殘而至成仇敵者有密取外人之子爲嗣者有呼喚樂妓入府姦用者甚至宮闈不肅致生外議其他將軍潛入富樂院宿倡者或與市人飲酒賭博者以致衣食之不足欠負於人鞍馬全無徒步於市雖有祿米不能供其浪費矣及至事發差官行勘事多不虛因違祖訓事干宗社有不終其天年者有幽之高墻者有削去爵秩者有革去祿米者况醜惡之事傳之中外

聞之天下又恐史冊書之貽譏後世誠有玷於朝廷若使原設輔導外官內官各得其人早爲諫正藩府親王肯爲戒諭鎮巡等官預爲具奏豈有前項之事哉與其懲治於已敗而示黜罰之典莫若保全於未然以全親親之仁如蒙乞勅各藩王除本府內官不缺不必具奏其餘缺少內官內使者明白具奏缺內官若干員內使若干名仍乞勅司禮監於相應內官內使擇其老成讀書者具奏照缺給賜前去以後有缺員奏除補互相維持府事其合用衣服飲食等項

本府照例關給使之得所不許凌辱陷害其郡王府
每府給賜內使二名專管宮闈事務及關防門禁其
長史紀善伴讀教授乞勅吏部今後有缺務要訪察
國子監並在外有學行儒官除授若藩王所爲未善
長史等官從容諫正如其不聽再三匡諫如再不聽
密切具奏其郡王所爲不合禮度者教授藩王密切
戒勉如再不聽藩王具奏情輕者降勅切責若干宮
闈軍事差內官皇親前去體勘密切處置不宜露泄
於外若係外事仍差內官并法司官前去勘問藩王
有過專罪輔導官員郡王有過專罪內使教授如此
防閑自無過舉其藩府輔導官員亦要逐日請王於
書堂內講講習禮王子王孫亦要講講習禮若各府
將軍有前項所爲者各府郡王自行禁治若藩王郡
王府互相容隱不行禁治許鎮巡等官將所爲不法
之事會本著實具奏上請區處其藩王府選用妾媵
務要具奏奉有明文定其名數不許於本府軍校之
家選用不許過數亦不許強買民間子女郡王將軍
使女俱照會官奏准事例名數若擅自買用女子及

名數過多或令外人入府者許鎮巡官叅奏長史敎
授降調遠方任用若樂工縱容女子擅入郡王府及
容留各府將軍在家潛行及軍民旗校人等敢有與
將軍賭博誑哄財物及擅入王府敎誘爲非者事發
發邊遠充軍色長依律問罪革去管事保全宗室真
過於此臣叨任大臣每見宗室所爲不善事發容之
則違祖訓所以不能保全者多臣竊憫之故敢冒昧
上言

崇禎八年禮部左侍郎陳子壯宗才換授非易疏臣

伏覩陛下求賢圖治之盛心致甄拔乎宗才明援祖
訓凡郡王子孫有文武才能堪任用者宗人府具以
名聞朝廷考驗授官職其陞轉如常選法至再至
三必欲見諸舉行臣待罪禮官二年矣從府部科諸
臣叅議此事僉謂三百餘年之曠舉宜加詳愼然臣
恭承節次之明諭實非尋常所能測度者蓋易之象
曰地上有水比先王以建萬國親諸侯堯典睦九族
以平章百姓人徒見官人以族一若有親比之迹者
殊不知聖人立賢無芳一平章百姓之心也聖人之

待九族也與天下士庶同其親親而賢賢義有兼該者也比者聖諭通行保舉之法令兩京文職三品以上於進士舉貢監中各舉堪任知府一人五品以上及翰林科道撫按司道知府官於舉貢監生士民中各舉堪任知州知縣一人亦何嘗有私於天下之才乎陛下之意誠以科目所以舉才而有不盡於科目者今乃四出弓旌廣張羅網即使諸臣有內舉猶且不避厥親而況於天潢之派乎曩所諭臣部至稱賢才不外於科目殊屬偏見者正此之謂而當四方多

故人材落落求所謂疏附後先奔奏禦侮於宗子維城之中卽拔十得五詎不勝任而愉快然而事有未必盡然者三有不可行者五請瀝其愚爲陛下籌之國家設資格以處常才而又不純用資格以待非常之才蓋不特非常之才不勝常才之多也亦以非常之事不勝常事之多也是故文職四品及在京堂以上官在外方面五品以上官有缺員皆具名以聞自五品以下吏部斯得銓註今進上初任亦止循其甲第迨不次擢用又往往超越常調焉若非有殊庸異

績及國家異常粹繼未聞拔卒爲將徒步而至卿相者濟濟克生非多於萬邦之黎獻也將資稔可以不論而非常之才亦可輩出乎臣竊以爲未必然也祖宗藩四民之業開其有才則於文科見有武才則於武科見宜已倘謂二科不足以盡才倍宜致重於二科之中自不宜因重才而輕二科也典禮雖大封拜未嘗朝賀獨朝賀於策士傳臚之後致辭天開文運賢後登庸何如其重也今謂進士豈必賢於舉人則舉人亦豈必賢於貢監貢監亦豈必賢於齊民夫然則天下胥爲齊民已矣又何必辛勤偕計以糜有司續食乎而臣部奉功令所日厲飭於科場文義字句之間凜乎其不可輕貸者又何如其重也然則謂科目之外遂足以盡才臣亦以爲未必然也夫科目之制本六經詩書之文用濂雍關閩之說漢人所謂經術宋人所謂道學不出乎此其獲儒者節義勲伐於此乎生其卽不獲儒者於以耗雄心消餘年亦不失爲白首窮經之士此祖宗磨礱一代之善物也故庸有通科目之義而不能窮理致用者矣未有不通

科目之義而能窮理致用者也今宗藩中非將軍則中尉有食祿之貴其所以屈首讀書者爲有科目之資裕可更進更榮耳使見不屈首讀書亦得掇拾奇榮以去誰肯避逸而趨勞乎而謂將有劉向李勉趙汝愚之才不由屈首讀書而進者臣亦以爲未必然也臣謹按洪武三年開科十七年始頒科舉定制猶在或行或罷祖宗之意未嘗以換授官職與科目出身並著當是時也親郡王將軍纔四十九位高皇帝親歷民間果見有懷才抱德如葉琛章溢之流慮有

遺逸異曰子孫千億亦宜有以致詳乎此也而非必謂已經開科復有換授之如此其多途也故當時任用則魏晉代遼寧谷六王勒兵備虜兒之子文正然且不效况今時勢視高皇帝爲何如換授之議臣期期知其不可矣乃至齊黃諸臣冒鼂錯之禍我成祖非不心高皇帝之心而時異勢殊也嘗駐蹕東平州謂侍臣曰漢東平王蒼開國於此其對明帝曰爲善最樂當時諸王泯沒惟蒼有賢名至今朕嘗以此勵諸王卿等勿忘斯語列聖繼承因是而飭越關奏擾

之禁因是而嚴王親任京官之條目列聖非不心高
皇帝之心亦時異勢殊也不特此也國初親王有每
年朝覲之禮凡遣使至朝廷不須經繇各衙門直詣
御前且有守鎮兵有護衛兵而又許歲時出城演練
者此大都開創之體制則然謂換授爲祖訓將議而
行之如前數者獨非祖訓乎亦將議而行之否也而
臣固有以知其不可矣高皇帝之時親王之祿五萬
石緞絹鹽菜之用亦復萬計不數年而止給祿米不
給雜用又不數年而減爲萬石又不能給而代慶遼

肅寧谷諸王且歲給五百石高皇帝令自己出而前
後已如此夫祿與爵一也乃祿猶可視物力爲盈虛
爵則名器所繫一假不可復收矣王几杖之賜叔段
京鄙之求又將何所限量乎當虜入河套而襄陵王
冲秋願率子孫及婿與總兵官從征請也憲宗皇帝
復書曰朕已命將出師征討矣茲得王奏見忠愛之
誠憂時之意但宗室子孫名分尊崇難與總兵官從
事自祖宗以來藩邦無從兵共討之例夫從兵共討
與勒兵備虜幾希矣而先朝致謹於此今宗室中忠

愛愛時如襄陵者不乏也而其才能又以文武舉也
假設以此來奏陛下又何以復之乎抑亦概許之否
也而臣固有以知其不可矣親王之耳目未免寄之
長史今也長史考察不屬之該撫按而屬之親王親
王以爲賢長史不得而異同也長史不得異同而該
撫按又孰從而核實乎故親王以爲賢核實賢則可
如或不然巡方之參差多有不便者矣核實以爲賢
考驗賢則可如或不然館驛之伴送多有不便者矣
考驗以爲賢至授職任用也始終皆賢則可如或不

然恭勤之瞻顧考功之連坐多有不便者矣而臣已
知其不可矣在外之八省有王府也在京而六部風
憲衙門之多有關於王府也進士舉人三年一試貢
士一年一試將來銓法推陞已不知如何如其衡量矣
文武才能之目是未可以數計者也既皇皇而招之
將源源而來懸人以待缺乎懸缺以待人乎抑權宜
以處之也而臣又以知其不可矣蓋公家之事總爲
公家計萬全非徒取銷繳於一時也臣觀大凡見有
所未明學有所不及有未必然而不碍於行者則寧

姑從而申之有非甚利於行而猶冀其然者則無遽
難以阻之今也有一於是乎貴臣之議其何以議之
臣部諸務經理宗藩是其大端故有善必揚有請即
覆者職掌之宜也雖臣之愚視象三月名封婚媾惟
恐後時旌獎郵諭惟恐缺典條議恩詔恤貧於非惟
恐不盡而獨爲此換授一事私憂過計反復躊躇以
告同官欲以人告者屢矣又恐萬有一分涉離間之
嫌斧鑕不足贖罪然臣叅侍講筵仰窺睿聽雖至迂
疎無當之論偶涉忌嫌尚且傾注不懈矧茲事件斟

酌遠大實非輕易故寧盲昧竭其狂瞽毋寧畫諾以
旁觀橫稜於兩可欺此心以欺陛下異日將謂臣在
事之久有所知而不言言而不盡猶斧鑕不足贖罪
也臣鄉之先達輔臣梁儲當武宗皇帝威嚴同列引
避之時代草秦王牧地一詔竟以回天而事遂寢臣
每歎息當日感格之奇轉成下濟光明之美況今遇
神聖之主乎事即少異所以防微杜漸之意則一伏
惟陛下俯賜採納允罷前議藩規銓政所全良多國
家磐石之重於焉永安祖孫繼述之隆亦爲盡善臣

愚幸甚知或微誠不足以孚鑒謫識無當於遠猷則請勅下五府大小九卿翰林科道等官各抒共議以憑裁斷或俟保舉知府州縣之法行之有效然後推做其意以保舉宗才亦未爲晚敷衍冗長有踰限式更望聖慈寬宥臣不勝悚切祈懇之至

僧道

宗伯倪岳疏該都御史馬文升奏我朝定制每府僧道各不過四十名每州各不過三十名每縣各不過二十名今天下一百四十七府二百七十七州一千

一百四十五縣共該額設三萬七千九十名成化十二年度僧一十萬成化二十年度僧二十餘萬以前各年所度僧道不下二十萬共該五十餘萬以一僧一道一年食米六石論之共該米三百六十餘萬可勾京中一年歲用之數況有不耕而食不蠶而衣且又不當本等差役可謂食之衆而爲之不舒矣其軍民壯丁私自披剃而隱於寺觀者不知其幾何民食不足府藏之空職此之由若不通查僧道之數以示再度之禁則遊食之徒何有紀極伏乞勅下禮部通

查天下並在京寺觀共若干處僧道共若干名如果數多既已闕有度牒難以追奪明白具奏不許額外再度僧道直至額數不足之時方許各該有司具結照數起送關給度牒敢有無故再言度僧者許六科十三道官糾劾拏問等因前件本部查得永樂十三年十一月二十七日節該欽奉太宗皇帝聖旨今後爲僧道的府不過數十名州不過三十名縣不過二十名額外不許濫收續於天順二年五月十五日節該欽奉英宗皇帝聖旨今後有願爲僧者務從有司

取勘戶內三丁以上年十五以下方許出家如額外有缺許照正統十四年榜例保送赴部考通經典然後給與度牒仍定與則例每十年一次開度許照缺依期來關敢有故違悉發邊衛充軍又查得成化二年給度過僧道一十三萬二千二百餘名成化十二年一萬三千三百餘名成化二十二年二十二萬四千五百餘名爲因十年一度兼且各處納銀賑濟等項多有不查額數不由有司保送一槩請給以此額外增添數將十倍是以軍民之籍日削異端之徒日

盛侵奪民食耗費民財其爲治道之蠹莫此爲甚誠
有如都御史馬文升所言者合無准其所奏行移兩
京僧道錄司并各布政司直隸府州縣各邊衛有寺
觀去處通查給度過僧道共若干備造文冊送部存
照以後各年有爲事病故等項追繳度牒者照名開
除仍將十年一度之例請乞停止待後各處額數不
足之日方許所在官司照依額內名缺起送赴部考
中給與度牒再不許內外衙門指以救荒納粟爲由
奏請給度庶得不致虧損國體僧道官亦不敢貪圖

僥倖敢有故違許科道官糾劾拏問等因具題節該
奉聖旨准冊少見繳到誠恐無知小人止以十年一
度爲期不知已有前項禁例以致各處僧道行童互
相煽誘輒便預先來京潛住各寺宮觀設禮僧道官
住持以圖至期可以夤緣請給一時不免蠶食京師
將來米價日漸湧貴未必不由於此查得成化十二
年節有奏准預期出榜禁約僧道不許來京騷擾事
例理合早爲照例查處案呈到部看得天下各處地
方災傷數多民不聊生盜賊竊發劫財殺人存在在

之中間解到賊徒多有僧人在內皆因先年給度泛濫所致及查先該錦衣衛指揮朱驥等奏稱奉勅巡捕盜賊今爲盜之人多係各處無藉僧徒晝在沿街乞食夜則相聚劫掠得贓卽分各行遠遁雖有巡捕人員無從追捕等因奉行都察院出榜禁約此爲明驗况天下僧道額數不過三萬有餘而成化年間所度已該三十五萬有餘此非天地別生一種之人不過出於軍民匠籍之家卽今天下軍衛有司工役衙門軍多缺伍匠多缺役里甲籍冊日見凋耗皆由此等之徒躲重投輕捨此入彼若不早爲限量將恐天下之人皆流而爲僧道之歸其爲貽患不可勝言合無本部查照先次奏准事理及累朝奉有欽依事例通行天下司府州縣掌印官督屬查勘原先給度過僧道數目見在若干事故等項若干比於欽定額數有無多少務照先次奏准事理造冊繳報除額數尚多去處外果有額數不足去處許待豐年有收之日徑自具奏本部查照成化十二年奏准給度事例月行奏請定奪施行仍要通行禁約各處寺觀僧道行

童不許指以請給爲由預先來京攪擾各該關津把
截去處嚴加盤詰阻當仍行錦衣衛五城巡視監察
御史嚴督各兵馬司僧道錄司逐一挨查各處寺觀
不許容留在外僧道行童在內潛住取具住持人員
不致扶同容隱結狀繳報違者坐贓問罪無度牒之
人發回原籍當差京城內外官員軍民之家亦不許
容留僧俗混雜有壞風俗事發一體究治其有內外
衙門及僧道人員或假救荒等項爲由妄行奏擾者
仍聽科道官指實叅劾問罪

淨身男子

宗伯沈鯉疏稽古內官之設載之周禮曰內小臣曰
閹人曰侍人曰內豎雖其職掌不過守王宮中門之
禁掌女宮之戒令與內外之通令然必求正人居之
如巷伯之倫是已降及秦漢而下乃以罪人充之我
朝法制高出前代伏觀大明律一款凡官民之家不
得乞養他人之子閹割火者違者杖一百疏三千里
又條例一款先年淨身男子曾經發回若不候朝廷
收取官司明文起送私自來京圖謀進用者問發邊

衛充軍臣等仰窺祖宗盛心卽古除肉刑之意所以重絕人道預抑姦慝也至弘治五年節奉孝宗皇帝聖旨今後敢有私淨身的本身並下手之人處斬全家發邊遠充軍兩隣及歎家不舉首的問罪其里老人等仍要時常訪察但有此等之徒即便捉拏送官如或容隱一體治罪不饒欵此但私淨之禁雖嚴而報官之路未開故自官者旋即如舊至萬曆十一年節奉聖旨自宮禁例載在會典皇祖明旨甚嚴乃無知小民往往犯禁私割致傷和氣著都察院便行五

城御史及通行各省直撫按衙門嚴加禁約自今年以後民間有四五子以上願以一子報官闔割者聽有司造冊送部候收補之日選用如有私割的照例重治鄰佑不舉的一併治罪不饒欵此但報官之路雖開起送之例未定故自來者紛然不已猶有曾萬壽等輩也夫以孝皇之明例皇上之嚴旨象啻三令五申乃十數年來有司有造一冊送部者乎有拏一私割照例懲治者乎法令不行德澤不布又何怪此輩之羣聚素擾乎伏望勅下臣部嚴行各省直撫

按官行令各州縣以文到之日爲始以前見在闕割者許令報名到官查係三十歲以下精壯可用者姑免追究准其記籍其衰老不堪者行令各里族拘收以後凡情願闕割者報官查明果四五十以上方與記籍違前類造清冊限半年一次送部候各監局缺人聽司禮監奏請本部通行在外各該衙門查係在冊人數取其官吏里鄰不扶甘結送赴部聽候選擇其冊籍無名及僥巧凶惡濫賴無恥者不許一槩濫送知有仍前私自闕割私自來京者在外撫按有

司在內五城御史嚴加訪拏照例問以重罪如撫按等官不行訪拏及有司不行造冊違例起送者聽本部查奏請旨究治務在必行無事姑息庶黎庶免傷殘之苦而慈惠旁流宦寺皆端正之人而墮竇永塞仁至義盡萬世無弊矣再照死者人之所最重也今自宮之徒加以死刑而不懼者內臣之員數太多富貴太驟選進太頻有以惑其心耳我太祖高皇帝深鑒前代之失祖訓條章內府各監局內官俱有定員各有職掌一監常職止五員一局正副止二員官不

過四品所掌不過洒掃供奉之事洪武永樂間未嘗
額外濫設其太監等官非歷練老成雖有聰明才俊
亦不輕授近年以來則有不然矣皇城之內通名籍
者不止萬有餘人而倉廩場庫牟利無算蟒衣玉帶
濫賞不惜又不三五年輒有一選選輒數千以故無
知小民貪圖富貴入骨薰心奈何欲以死刑禁之乎
臣等更望皇上恪遵祖制凡監局冗員非祖宗之舊
者悉爲裁革一切侵漁科索等弊悉爲釐正蟒玉等
服非効勞年久忠勤不欺者勿輕賜予仍著爲定例
不終爲聖化之累矣

古香齋覽賞袖珍春明夢餘錄卷之三十九

順德梁振藻初校
南海孔昭鑿再校
番禺林國廣三校





1